

BOITSEBISO BA KRESTE

MENGWAHENG YOHLE

 Ruri ke nka wona e le monyetla o moholo ho ba mona bosiung bona. Ke kgetlo la ka la pele le ka mohla mona motseng o motle wa Birmingham. Oh, esale ke batla ho tla, hangata. Empa e ka dintho di sebetsa di dikoloha, mme Morena o beetse dintho dinako tsa Hae ka Sebele, ka hona o E sebeditse jwalo. Re motlotlo ka nako ena, le ka baka la batshehetci bana ba batle.

² Mme jwale bosiung bona ho batla ho... Kamehla re tshwara bosiu ba ho-ho tsebana. Mme, wa tseba, ha u kene moahong o ka ona, moo ho nang le... o sa kang wa sebedisetswa ditshebeletso tsa kereke, ha ke kgolve. Ha ke utlwisia ke polokelo ya dibetsa. Ekaba feela ekaba nqalo ya boithapollo, le ho bapala dipapadi, le dintho tse jwalo. Ha e ke ho kena kerekeng. Etswe... Ke dumela kerekeng o fumana Moya wa Modimo o le teng, le maikutlo a kgetehileng. Empa ha o kena tulong ya boithabiso, mme ka dinako tse ding ka boitshwaro bo jwalo, eka ho thata le ho qala, ho fihlela re tsebana. Mme, hape, bohole re basele, e mong ho e mong, e batla e etsa... Be, rea sheba mme rea ipotsa. Empa hola re ka leka ho sutha mono, ka potlako e kgonehang.

³ Mme—mme le hopole feela re mona ho sebeletsa Morena Jesu. Re mona ho etsa seo re ka se kgonang, sohle seo re ka se kgonang, ho ntshelletsa Mmuso wa Hae. Mme le nna ke kenya boikgathatso ba ka bo bongata. Mme nke—nke ka e etsa ke le mong. Ke ka thuso ya lona le thuso ya ka, le thuso ya Modimo, mme ka Yena re ka kgora ho bona kganya ya Modimo e theoha e re etela. Mme ke sona seo re tla beng re se batla, ke seo re leng mona ka sona, ke ketelo ya Modimo.

⁴ Jwale ha re bangata ka palo, mme ha re na matshwele a maholo haholo. Re ke ke ra dula halelele. Mme ntho e nngwe, ke... Molaetsa wa ka haholo o ya bathong ba Evangeli e tletseng. Ke hodima mabaka ao, leha kwana ho tla mang kapa mang.

⁵ Re rapella bakudi. Mme ha re itlalehe ho ba mofodisi kapa motho ya ka fodisang e mong. Re dumela mofodisi a le mong, ke Modimo. Empa re dumela A kgethile motho ho rapella bakudi, mme re etsa seo. Re rapella bakudi. Mme Morena o bile mosa ho rona, ho arabela dithapelo tsa rona, hangata hakana. Mme rona, lefatshe ho pota, re bone, be, batho ba dikete atisa ka dikete, diritsa, ba mahlomoleng, difofu, dihole,

ba omeletseng ditho, ba fodiswa. Mme re dumela feela hoba re feela...ho re, "A tetekwa ka baka la makgopo a rona; re fodisitswe ka maqeba a Hae." Mme re dumela e le wona moputso, ke monyetla wa, ho badumedi.

6 Jwale, ha se ya basadumeleng. Batho ba re, "Be, ha ke—ke dumele e ka etsahala." Be, e ke ke ya etsahala ho wena. Feel—a feela o kgodisehe ka seo, e ke ke ya etsahala ho wena. Empa e tla etsahalla ba dumelang, hoba e lebisitswe ho badumedi feela.

7 Jwale hoo ha ho re etse mofodisi, jwaloka thero ya pholoso e sa re etse Mopholosi. Re—re tseba mofodisi a le mong le Mopholosi a le mong, mme ke Motho a le mong, Jesu Kreste. Re mona ho Mo tlotsisa bathong.

8 Jwale, ka tshwanelo tsoseletso ha se ho eketsa maloko kerekeng. Tsoseletso ke ho tsoseletsa seo o seng o ena le sona. Mme ke hangata ke ipotsa morero wa tsoseletso.

9 E ka ho a makatsa, ho wena motho o sele, ho bua sena. Empa ke ne ke eme lebopong, tsatsi le leng, kwana Letsheng la Michigan. Ke shebeletse maqhubu, kamoo a kenang mme a tswa, mme a tlolake. Oh, keha ho foka meya e boima, mme—mme maqhubu a qhomele sebakeng, mme a fehlehe a ya hodimo-le-tlase, a boele a thetehe a kene mme a kgutle a tswe, mme a thetehele kahare hape. Ka nahana, "Kgele, tsoseletso e kakang!" Empa, wa tseba, metsi a ka hara letsha leo ha a fete a mohla le bataletseng mme le kgutsitse ka ho phethahala. Ke hantle. Le sa ntse le momme bokaalo ba metsi. Wa bona?

10 Ebe kea ipotsa, hore'ng letsha leo le fuduhuwe hakana? Jwaleka rona ha re fudueha tsoseletsong. Rea fehleha. Wa tseba hoo ho etsa'ng ho letsha, le hona? Lea hlwekiswa. Le hlatswetsa tshila yohle lebopong. Ke lona lebaka ho rona re lokelang tshwara tsoseletso; ho tlosa ho se dumele hohle le dintho ho rona, re tle re bone ka ho hlaka seo Modimo a re batlelang sona. Re lebeletse seo nakong ena, ke tsoseletso hara batho.

11 Jwale, motshehetzi wa ka, Moena Urshan, baena bana mona, mme ekaba ba bang ba dutse kantle koo. Jwale, ke basebeletsi ba Modimo, jwaloka nna kapa basebeletsi ba bang. Mme e...

12 Jesu o boletse, ka mohla o mong, "Mmuso wa Mahodimo e ka monna ya nkileng letlowa mme a kena letsheng. Mme hoba a lahlele letlowa, a le hula, mme ka mono a fumana dintho tsa mefuta yohle." Letlowa la Evangedi le tshwasa dintho tsa mefuta yohle, jwale, dihlapi tsa mefuta yohle. Wa bona, kwana tse ding tsa tsona, re ka re, e ne e le dintja tsa metsi, tse ding tsa tsona e le dinoha, tse ding diokgo, tse ding dikgudu, le—le jwalo, mme tse ding e le hlapi ya mannete. Ka hona, ha re tsebe seo re se tshwasang letloweng, re mpa re sesefa.

¹³ Mme jwale kea tla. Disesefo tse pedi di fihla hole ho feta sesefo e le nngwe, mme ke tlie ho lahlala letlawa la ka. Ke ho seseфа. Re e bitsa jwalo, hodimo Leboya, ho *seseфа*. Mme ke tlie ho—ho tsokotsa letlawa la ka mmoho le matlawa a bona, matlawa a lona. Mme ha re lahleng ka ntle koo, bohole boo re ka bo kgonang. Mme re teanye matlawa a rona, le dipelo tsa rona mmoho, le maiteko a rona mmoho, mme ha re huleng, re bone haeba hlapi eo Mongame a ka e sebedisang e le teng. Mme ke Yena Ya ka ahlolang hoo. Rona ha re tsebe. Tsohle ho rona di a itshwanela. Di mpa di tshwasitswe ke letlawa. Empa Modimo wa tseba ke bo mang, mme o tsebile ho tloha tshimolohong. Re mpa re le basesefi, ha re baahlodi ba eo e leng le eo e sang yena. Re mpa re seseфа, ka hona ke mona ho le thusa.

¹⁴ Mme jwale veke ena, le rapele, tshwara mohala, letsetsa motho e mong, mme o ba memele kerekeng, kwano diahelong tsa masole mona. Re na le nakwana feela. Ho a ferekana, ho ferekanya batho ha o se o ba tlwaela, mme batho ba se ba tsitsitse, mme o se o tlameha ho ya nqa e nngwe.

¹⁵ Esale ke ipotsa, ka dinako tse ding, na—na nka se kgone, le leng la matsatsi ana, ho fumana tente ho tla motseng o moholo tjena le ho e hloma, re tle re dule diveke tse mmalwa; le ho tshwara kopano ya bareri hoseng, le ho kopana le bareri bohle le ho qoqa ntho eo.

¹⁶ Mme ke tshepa Morena a tla sitsa maiteko a rona veke ena. Ke tshepa ho sa tlo sala moalo o le mong, kapa setulo sa mokudi, e ka bang eng, e setseng mona; kapa mokudi a le mong a tshwerwe ke lefu la pelo, TB, mofetshe; haese bao Morena Jesu a tlang ho ba fodisa. Ke tla nne ke rapele.

¹⁷ Ha se hangata ke tjhakang, ka lebaka, wa tseba, la tshebeletso ya mofuta ona. Ha se hoba ke sa batle ho tjhaka. Empa ka hoba nke ke—ke—ke ka sebeletsa Modimo le motho, ka nako e le nngwe. Ke tlameha ho dula boinotshing ba ka mme ke rapele. Mme hoo ke tla be ke ho etsetsa lona. Le lona le etse karolo e nngwe, ho phutheha le ho kenya batho kahare, le dintho tse jwalo, le tlise bakudi le ba mahlomoleng; le nthapelle, e mong le e mong a nthapelle. Re hapa hlolo jwalo.

¹⁸ Jwale ho bea motheo wa seo re lekang ho se etsa. Rona, pele, ha rea emela bodumedi bofe; ha se ho ba kgahlano le bodumedi bofe, empa feela ha rea emela bofe. Re ema . . .

¹⁹ Ke ne ke tlotswe, Baptise ya Boromuwa. Mme yaba ke tela setlankana sa ka sa botho, e seng seqoqo le baena beso, ke tle ke se emele sehlopha sefe. Ka tshelela ho Pentekosta, mohla ke rapellang bakudi mme ke ronngwe ho etsa hoo. Ka tshelela ho Pentekosta, mme ka fumana, ka hopola e le sehlopha se le seng sa bona, empa ka fumana dihlopha tse ngata hakale ka

Baptise, tse fapaneng. Ka hona ka—ka ba bona ba ngangisa, le Baptise ba ne ba ngangisana, ka *sena, sane*, le se *seng*, ka hona ka ba tlohela ba ngangisana.

²⁰ Mme ke tla leka ho kopela mang le mang ka matsoho, le ho re, “Bohle re baena. Feela a re sebeletseng Morena.” Mme tshwaetsonyana efe eo nka e fetisang, ha ke e behe hodima bodumedi bo itseng, ke hodima Kreste feela. Mme mono re... Mme re leka ho Mo sebeletsa jwalo.

²¹ Mang le mang o a mengwa, ho sa tsottelehe. Mang le mang o amohetswe. Ha feela o itshwere o le taolong, kgele, o amohetswe kamoo o ka kgonang.

²² Jwale, ntho e nngwe, ke tsamaiso ya rona ho rapella bakudi. Jwale, letsatsi ka leng, Moena Borders, kapa Terry, kapa Moena Sothmann, kapa Billy Paul kapa...Ka tlwaelo, ke Billy Paul. Ke mosebetsi wa hae. Mme ha a sa kgone ho fihla mona, e mong wa banna bana o tla ntsha ditlankana sa thapelo letsatsi ka leng. Ba etsa hoo; ba theoha, ho nka ditlankana tsa thapelo, lekgolo la tsona, le ho di tswakanya, hantle ka pela mahlo a lona, mme ba ntano abela batho ditlankana, ba se batlang. Jwale ba etsa hoo letsatsi ka leng. Ka hona, mohla re ne re qala, re fumane o tlameha ho sebedisa ditlankana tsa thapelo. Ha se arena, wa tseba, ba sututsana. Ke e... O tlameha ho e tsamaisa ka taolo.

²³ Mme yaba re fumana motho a leka ho rekisa ditlankana tsa thapelo, mme a tiisetra batho ba tla nyolohela, kalaneng. Mme ka hona, hoo, ka tlameha ho kgaotsa hoo. Mme yaba ke bea mora wa ka mono, hoba ke mo tsebile a sa tlo rekisa le se seng.

²⁴ Yaba ho fihla mohopolo, “Mphe setlankana se itseng sa thapelo. O tlilo qala kae ho ba rapella, bosius bona? Mme yaba kea—ke a tlilo rapela...ke batla setlankana seo sa thapelo.” Be, ho kgodisa moshanyana eo, tjhe, ha a tsebe moo mola oo wa thapelo o tla qala, o fuduha ditlankana, a ntano le abela tsona. Ha a tsebe o fa sefe. O mpa a o fa setlankana sa thapelo. E mong a ka fumana palo ya nngwe, e mong a fumane mashome a mahlano, le—le jwalo.

²⁵ Mme ho e menahanya ho feta ke fihla bosiu, mme ha ho motho, mme ha ke tsebe, ka bonna, moo ke tla qala ke bitsa ditlankana tseo tsa thapelo. Nka qala ho nngwe, mme nka qala ho mashome a mabedi a metso e mehlano. Nka qala ho mashome a supileng a metso e mehlano kapa lekgolo, ebe ke sebeletsa morao; leshome le metso e tsheletseng, le ho ya pele le ho kgutlela morao. Mang le mang ya kileng a kena tshebeletsong, o a tseba re e sebetsa jwalo, morao le pele feela, hohle.

²⁶ Mme, hape, letsatsi ka leng. Pele, rea theoha re abe ditlankana tsohle tsa thapelo, letsatsi la pele; ha motho e motjha a fihla, ha ba fumane setlankana sa thapelo, ho

dutse jwalo, ha ba kgona ho rapellwa nakong ya tshebeletso. Empa jwale re di aba, letsatsi ka leng, hore mang ya batlang setlankana sa thapelo a se fumane. Mohlomong bosiu bo bong ha re di finyelle kaofela, empa, ako tshware setlankana sa hao, re tla se finyella pele re tsamaya.

²⁷ Jwale, empa bongata, bongata bo teng bo fodiswang hara letshwele, bongata bo fetang bo fodiswang mona kalaneng. Tumelo ya hao ke yona e o fodisang. Ha se thapelo ya rona. Thapelo ya rona e tla thusa, ha ho pelaelo. Re tla phutheha, re le rapelle, e tla thusa. Mme haeba . . .

²⁸ Mme Sontaha thapama, ha Morena a ratile, re tla rapella e mong le e mong, re tla nka ditlankana tsa bona tsa thapelo re rapelle bohole; kapa bosiu ba Moqebelo, neng, e itshetlehile ho baena ba re batlang ho etsa hoo.

²⁹ Mme jwale re batla ho bua sena le tle le utlwisise. Lebaka leo ke hlakolang mola oo wa thapelo, ho kopana le motho ka bomong, ke molao wa ka oo, morero wa ka—ka, ke ona, hore batho ba tle ba amohele Kreste e le mofodisi wa bona motho a sa ba bea matsoho.

³⁰ Ka tlwaelo, ha re re moevangedi, o fihla motseng, be, yena ke—yena ke ntho yohle ka kerekeng. Mohla a tlohang, nako tse ding phutheho e sheba modisa wa yona, mme ho thwe, “Be, le reng ka modisa wa ka?” Ke o batla o tsebe hoba modisa wa hao ke monna wa morapedi, mme ke le batla le mo hlomphile mme le tseba hhoba monna eo o tlotsitswe se ka mang a tlotsitswe ho rapella bakudi. Mme re—re batla ha lona . . . mme—mme ka . . .

³¹ Ebile, morero wa rona, boholo, ho lona ke ho bona Sefahleho sa Jesu Kreste, le ho tseba hobane O teng mona. Mme hape, e re o sa dutse pela Sefahleho sa Hae, aka Mo amohele e le Mopholosi wa hao le Mofodisi. Ha o sa bolokeha, Mo amohele e le Mopholosi. Ha o bolokehile, mme o sa fola, Mo amohele e le Mofodisi wa hao. Ke moo motho a ke keng a re, “Moena *Sekete-kete* o mpeile matsoho.” Tjhe. Ke wena ya beileng matsoho hodima Hae, ke hona ho bohlokwa. Jwale ke batla le e hopole kelellong, ka dinako tsohle. Ke wena ya beang a hao . . . ya Mo amang. Mme Bibele e boletse, ya re, “Ke Moprista e Moholo ya ke keng a sitwa ho angwa ke maikutlo a mahloko a rona.” Mme jwale le hopole seo, ke wena ya Mo amang. Ha se . . .

³² Modisa o na le tokelo ya ho bea matsoho. Ho bea . . . Ha se modisa a nnosi. “Mehlolo e tla tsamaya le ba dumelang ke yona ena,” badumedi feela, mang feela ya beang matsoho hodima bakudi, o na le tokelo ho etsa hoo. Ke ho iketsa setlama le motho eo, thapelang. Jwaloka o bea matsoho a hao, ka tumelo, hodima Kreste, mme o iketsa setlama le Sehlabelo sa hao. Ka hona le hopole seo jwale e re—e re veke e sa tswella, mme le rapele ka botshepehi.

³³ Jwale, ke hopola hoo ho batla ho e aletsa jwale. Mme hape bosiu ka bong re leka ho tswa ka nako, ka nako eo re ka e kgonang. Jwale, re qala metsotso e mashome a mabedi a metso e mehlano pele ho robong, ho latela tshupanako ya ka. Mme ha Morena a ratile, re batla ho tswa bosiu ka bong ka mashome a mararo ka mora robong, kapa e ka bang pele, le tle le fumane nako e lekaneng, ho kgutlela mahabo lona le ho kgutla. Jwale ha o eso rapellwe, kapa o sa e tshware bosiu ba pele...

³⁴ Tshebetso ya ka e batla e le hlolla. Empa haeba e hlolla, o se e lahlele ka thoko feela. Dula o e nahanisise; nka Bibele. Jwale, ke dumela Modimo a ka etsa tsee A sa a di ngolang mona Bibeleng, empa ke Mo batla feela... Ha feela A ka boloka se A se ngotseng *Mona*, ke tla e kgotsofalla.

³⁵ Hobane, re phela matsatsing a dintho tse fapaneng tse hlollang, mekga e sa ye ka lengolo. Empa, wa tseba, mehleng ya Nowe... Jesu o boletse, "Jwaloka mehleng ya Nowe." Wa tseba, mohlomong batho ba ahile diketswana matsatsing ao, e bang di ahilwe ke Modimo kapa tjhe, empa di sitilwe ho phahama mohla nako ya ho phahama ha tsona e fihlang. Ka hona ke batla Molaetsa o ahilweng ke Modimo ka Mangolo, Molaetsa o yang ka Lengolo, mmoho le Wona, ntho ka nngwe ka Lengolo. Ke HO RIALO MORENA, le hona. Mme e tlameha ho tiya, hobane, lentswe la ka ha se lona le amehang, e tla be le Lentswe la Hae le amehang. Ho e hlahisa e tswa Lengolong!

³⁶ Mme re fetola lekgatthe. Jwale re a fetoha. Mme phethoho ka nngwe, eka ho aha moaho, o fihla khoneng, o tlamehile ho betla khona eo, hoo—hoo ho a makatsa. Mang le mang o batla ho matha a theoha a otlolohile; o no tla fumana lerakohadi le le leng. Empa re aha moaho. Re thulana le dikhona, mme o tlameha ho fetoha, dikhona tseo. Jwaloka Moena Don Price hantle hakana, a... mme a qadile hantle hakana nakwana e fetileng. Dikhoneng tseo ke hona moo bothata bo hlahang, moo ntho... Ho boima khoneng eo, ho bopa, ho betla khona eo le ho e lokisa hantle feela.

Jwale pele re bala Lentswe...

³⁷ Bosiu ka bong, Moena Borders ke manejara wa tshimo, mme o boetse o bua kalaneng.

³⁸ Mme Ngaka Lee Vayle o teng kae-kae. Ke kgolwa a fihlile mona. O kopane le nna Kentucky, ke kganna ka dimaele tse mashome a mararo ka hora, ke emeletse Ford e nngwe ke e pshatla. Mme ka hona, ha ke theoha, ka kopana le yena. Mme ke—ke monna wa dikgokahano tsa setjhaba. O tla be a bua, kea kgolwa, neng kgabareng ya kopano, neng letsatsi ka leng. Ka hona dipotso ha di le teng kapa letho, kgele, le botse Moena Vayle, o tla kgona ho le thusa dipotsong tsena. Ho lokile. Jwale e re re sa... [Sekgeo lebanteng—Mong.]

³⁹ Pele re bala Lentswe, ke na le moetlo wa ho ema ha re bala Lentswe la Modimo. Rea ema ha re bina *The Star-Spangled Banner*, mme re lebisa dikano, ebe horeng re ke ke ra ema ha re bala Lentswe la Modimo!

⁴⁰ Bosiung bona ke tilo bala ho Baheberu, kgaolo ya 13, ho qala ka temana ya 1.

Lerato la boena le tiye.

Le se ke la lebala ho amohela baeti: hobane ba bang ka ho etsa jwalo ba amohetse mangeloi ha bona ba sa tsebe.

Hopolang ba ditlamong, ho be jwaloka hoja ke tlamo le bona; hopolang ba etswang hampe, etswe le sa le mmeleng le bona.

Lenyalo a le ke le hlomphehe hara batho bohle, le diphate di hloke ditshila: hobane Modimo o tla ahlola baboki le bafebi.

Ketso tsa lona di hloke takatso ya ho rua; *le ke le kgolwe ke tseo le nang le tsona: hobane o sa itse, Nke ke ka o tlohela, nke ke ka o lahla.*

Ka baka leo re ka re ka tshepo, Morena ke mothusi wa ka, nke ke ka tshoha letho motho a ka nketsang.

Hopolang badisa...lona, ba le boleletseng lenseswe la Modimo: mme le etsise tumelo ya bona, le ntse le lemoha getello ya ho bophelo ha bona.

Jesu Kreste e ne e le yena maobane, e sa le yena... kajeno, mme e tla nne e be yena ka ho sa feleng.

⁴¹ Ha re inamiseng dihlooho tsa rona nakwana, thapelong. Jwale ka dihlooho tsa rona le ka dipelo tsa rona tse inamisitsweng, kea ipotsa dikopo di ka ba teng bosiung bona, le lakatsang ha di hopolwa, na le ka phahamisetsa matsoho a lona ho Modimo, ho re, ka seo, “Nkgopole, oho Morena.” Kea leboha.

⁴² Ntata rona wa Lehodimo, ere re sa atamela Terone ya Hao e Kgethehileng, ka Lebitso le tletseng bokgoni-bohle la Morena Jesu, Ya itseng, “Ha le kopa Ntate letho ka Lebitso la Ka, le tla etswa.” Mme re motlotlo haholo ka tshepiso eo, ho tseba sena, hobane tumelo ya rona e hatella ka nqane ho meriti ya pelaelo, ho tseba hobane rona, ka tumelo, re bua le Modimo o Matlawohle ka seqo. Hobane, ke tshepiso. Mme ho boetse ho boletswe, “Moo ba babedi ba kopaneng ka Lebitso la Ka, le nna Ke teng hara bona.”

⁴³ Jwale e mong le e mong wa rona o na le kopo, Morena, jwaloka re phahamiseditse matsoho a rona ho Wena. Ke Wena o tsebang se ka hara dipelo tsa rona, ka tlasa letsoho la rona. Mme re O rapela ho re arabela, Morena. E se hoba re

tshwanelwa ke karabo, empa kahobane O tshepisitse ho araba. O itse O tla e phethisa. Mme kea tseba O tla e phethisa, hobane O a—O Modimo o moholo o entseng mahodimo le lefatshe, le Moahlodi wa mahodimo le lefatshe. Mme na O ka bolela taba O ke keng wa e nepahatsa? Taba e jwalo e hole le Modimo. Se haellang, ke tumelo ya rona ho e dumela.

⁴⁴ Mme rea rapela, Morena, bosiu bona bo tla—tla bo totisa tumelo ya rona hona le ho e hlohleletsa maemong ao re tla tsamaya le yona, Morena, ka nqane ho dikutlwisiso tsohle. Hoo, re ke ke ra leka ho utlwisia; re tla mpe re dumele feela. “Mme tumelo ke kgodiso ya dintho tseo re di lebeletseng, mme ke pontsho ya tseo re sa di boneng kapa re ke keng ra di paka.” Re a e dumela, mme e . . . Modimo o a e etsahatsa.

⁴⁵ Mme rea rapela, Ntate, hore mono, hore—hore Mangeloi a Modimo a tle a eme monyako ka mong, le moleng ka mong wa ditulo, le teng—teng setulong ka seng; mme a ahlole baetsadibe, hore—hore ba, hore—hore ba phoso, mme ba ke ba amohele Morena Jesu, ke hona. Mme ba se nang kolobetso ka Moya; Moya o Halalelang o ke o tsholohe re sa bua, mme Boteng ba Kreste esale nnete. Aba sena, Morena. Re rapella ho se be le mofokodi hara rona. Motho ka mong a kenang menyako ena, Morena, a susumetswe ke tumelo hoo ba tla fodiswa, e mong le e mong.

⁴⁶ Hlohonolofatsa bareri bana, Morena, dikereke tsena ho phatlalla le naha. Ere, ka baka la boikitlaetso bo boholo bona batho ba bo nkileng . . . Re bathwana, empa, leha ho le jwalo, Morena, re batho ba tshepehang mme ba leka ho boloka Tumelo e kileng ya abelwa bahalaledi ka nako e nngwe, hara lefifi. Ho ke ho tsohe tsoseletso ya mehla-ya-kgale, ke hore, e ke e ropohe hohle hara dikereke, mme bahalaledi ba lapileng ba qale ba howeletse, mme baetsadibe ba tswallwe Mmusong wa Modimo, e be bahalaledi. Aba sena, Morena. Ke morero wa rona oo. Ke sona se dutseng dipelong tsa rona. Re leka ho etsa sena bakeng sa tlotla ya Hao, Morena, hoba rea tseba ha rea dula halelele.

⁴⁷ Re bona lefatshe le tlakaselang le boelang le tsukutleha, le hona mohla Labohlano le Molemo, jwaloka dilemo tse sekete le makgolo a robong tse fetileng ka Labohlano le Molemo. Mme O boletse ho tla hlaha dithothomelo tsa lefatshe dibakeng tse ngata. Re bona ho hlaha dipontsho tsohle tsa mefuta, mme rea tseba nako e haufi.

⁴⁸ Ka hona, Morena, re batla ho sebetsa re sa kgona, hoba, mohla bophelo bo fedileng, ha re sa tla sebetsa. Mme rea rapela, Ntate wa Lehodimo, re tle re kenyé maiteko a rona nakong ena. Mme e tle re ha tshebeletso e fetoha histori, re ikutlwre re sebeditse ka bokgoni ba matla a rona. Aba sena, Morena. Hlohonolofatsa baena ba ka, hohle. Hlohonolofatsa bohole ba tla kena tshebeletsong, le ba tlangu ho utlwa. Hoba re e kopa ka Lebitso la Jesu. Amen.

Le ka dula fatshe. Kea o leboha, moena.

⁴⁹ Ke batla ho qotsa therero bosiung bona, hola nka e bitsa therero, puonyana ya tlwaelo, mme e bitswa, Jesu...Yena Kreste, ke rialo, o itsebisitse mengwaheng yohle. Ka mantswe a mang: *Boitsebiso Ba Kreste Mengwaheng Yohle*.

⁵⁰ Hobane, Baheberu 13:8 e boletse, "Yena maobane, kajeno, le kahosafeleng." Mme re batla ho—ho bona, kamoo mehleng e fetileng, seo A na le sona. Jwale, re bua ka Yena haholo, mme ke seo re leng mona ho se etsa jwale ke ho bua ka Yena. Mme jwale, haeba esale Yena maobane, kajeno, le kahosafeleng, mme—mme haeba A bonwe mme a tsebilwe maobeng, horeng ho se jwalo kajeno? Haeba A bonwe mme a tsebilwe, mme a tsebahaditswe matsatsing a fetileng, ebe horeng re sa etse jwalo kajeno?

⁵¹ Re fumana, Motho e moholo enwa, ho se motho ya ka utlwelang tsa Hae ba—ba sa batle ho fumana haholwanyane ka Yena. Ntho e teng ka Yena! Lebitso leo la Jesu Kreste, ha ho lebitso le leng, sebakeng sefe, le hulang batho jwoloka leo. Ntho e teng ka Lona!

⁵² Motho, e, o a tseba o tswa tulong e nngwe ka kwana. Mme dipakeng tsa hae le moo a tswang teng pele a fihla mona ho leketlile seriti sa kharetene e lefifi, mme o a tseba o tlameha ho potela ka mora kharetene eo. Mme esale a batla ho tseba moo a tswang teng, seo a leng sona, le moo a yang teng. Re fumana ho ngodilwe divolunu tse dimilione, kea kgolwa, ka temana ena. Empa Buka e nngwe feela, mme yona ke ya... Yona ke divolumu tse mashome tshelela-tshelela ka Boyona, e ka o bolellang moo o tswang teng, hore o mang, le moo o yang teng, mme yona ke Bibebe. Ke Lentswe le o bolellang moo o tswang teng, hore o mang, le moo o yang teng.

⁵³ Batho ba bangata ba tshwere mehopolo e mengata e fapaneng ka Kreste, mme haholo letsatsing lena la rona jwale.

Re fumana ba bang ba Mo nkang e le moruti e moholo feela.

⁵⁴ Atho, E ne e le yena, empa E ne e le ya fetisang moruti e moholo. Wa bona? E ne e le yena. Ha ho motho ya kileng a bua jwoloka Yena, empa O ne a fetisa moruti ya lokileng feela. Empa ekare mofilosofe e moholo dikerekeng tse ngata kajeno, ba Mo nka e le moruti feela, ho se ya kileng a ruta jwoloka Yena pele. "O mpa a le moholo, ranalane wa kgale ya babatsehang, kapa moruti, ke rialo, wa matsatsi a fetileng. Thuto ya Hae e kgabane, mme o ka dumela karolo ya yona, mme karolo ya yona o ke ke wa e kgona. Empa E ne e le mofilosofe ya kgabane!" Ka mantswe a mang, ba Mo nka eka Confusiase, e—e mofilosofe wa Mochaena wa makgolo a fetileng a dilemo. Jwale, O ne a fetisa moruti. O a—O fetisa moo.

Ebe ba bang, ka Yena, ba Mo nka e le monna ya lokileng feela.

⁵⁵ Be, Yena, E ne e le monna ya lokileng. E le yena feela Monna ya lokileng re kileng ra mo fumana ka nneta, e ne e le Yena. Ha tlameha ho hlahe Monna a le mong feela ho shwela rona monna ya kgopo, ho—ho re fetola ba lokileng, e se ka mesebetsi ya rona; ka seo Monna a le mong ya lokileng a se entseng, o lopolotse sehlopha sohle e leng rona, wa bona.

⁵⁶ Mme ekaba bowatla bo bo kae, ka mora ho hlahisa tsela e le nngwe feela ya topollo, mme ho entswe leano le le leng feela, mme le latolwe. E tla be e le e—e ntho e bohlaswa ho etswa, ho furalla yona feela tsela, lona feela leano; ke Modimo, leano la Modimo. Maano a mang a mangata; empa Modimo o radile leano, mme leano leo ke ka Jesu Kreste, Yena a le mong. Ha se ka tsamaiso efe feela, tsamaiso efe ya thuto kapa tsamaiso ya bodumedi bofe, kapa le letho. Ke ka Jesu Kreste, mme Yena a le mong. Ke leo leano la Modimo la Bosafeleng, ka Yena. Modimo o etsa dintho ka tsela e le nngwe kamehla. Ha A fetole tsela ya Hae ya ho e etsa.

Jwale re fumana ba bang ba re, “E ne e le moporofeta.”

⁵⁷ Mme, moporofeta, E ne e le yena, empa E ne e le ya fetisang le moporofeta. E ne e le moporofeta, kopanya le ho hong. Mme ho kile ha hlaha baporofeta ba bangata. Mme baporofeta ba shweletse kgorong ya lefu, empa Monna enwa o nkile dinotlolo, “lefу, dihele, lebitla,” jwaloka Samsone a nkile dikgoro tsa Gaza, a di motsula; a fothola tsenene le lefu ka bolona, mme la metswa ke tlholo, mme a tsoha ka letsatsi la boraro, e le mofenyi, ho fetola badumedi ba Hae ba fetisang le bahlodi. Le se le hlotswe. Ha ho letho le setseng ho etswa haese ho tsamaya ka pina ya bahlodi ka kotlololo dipelong tsa rona. Ke Yena mohlodi e moholo, mme e moholo Enwa o ne a fetisa le moporofeta.

⁵⁸ Jwale, baporofeta e ne e le banna ba baholo. Re—re tseba seo. Lentswe la Morena le tlide ho baporofeta; mme le tla ho bona, homme bona feela. Mme re fumana hoo e le Lengolo, seo Le se buang. “Ha A etse letho pele a boleletse bahlanka ba Hae baporofeta, pele.” Mme e ne e le banna ba baholo, empa Monna enwa o ne a fetisa le moporofeta.

⁵⁹ Jwale rea fumana, ke hona, bongata ba batho ba mo hopola E ne e le mohlophisi wa kereke, ho etsa . . . e le monna e moholo wa kelello ya tonana, mme dikereke tse hlophisitsweng, o tsebile ho di teanya mmoho.

⁶⁰ Ke utlwile moprista a bua, nakwana e fetileng, ho re, “Jesu Kreste o ne a hlophise kereke ya pele ya Roma, mme O tlamehile a be a tseba mokgwa wa ho e sebetsa.”

⁶¹ Jwale, Kereke ha eso hlophiswe, mme ha E a qala Roma. E qadile Jerusalema, ka Letsatsi la Pentekosta, mme e sang Nicaea,

Roma. Mme E . . . Mme Jesu ha a eso hlophise letho. Yena, ntho feela A e entseng, e ne e le ho bitsa. Wena le ho leka, ha o a hlophisetswa ho Kreste; o tswallwa Mmusong wa Modimo.

⁶² Ke—ke sa tswa feta letsatsi la ka la tswalo, Mantaha a fetileng, mme ke etsa dilemo tse mashome a mahlano-le-hlano. Mme o a tseba, lelapa la Branham ha le eso nkope ho ngodisa selelapa. Ke tswetswe ke le Branham.

⁶³ Mme le rona re Bakreste jwalo. Re tswetswe re le Mokreste feela, ka Matla a tsoho a Jesu Kreste. Mme re Bakreste ka tswalo. Hono, ho re fetola dibopuwa tse ntjha. Hlahong ya rona ya kgale, re ne re ka sitwa ho ba Bakreste. Ke lona lebaka, kajeno, re fumanang bongata bo ipitsang Bakreste, mme ba iphelela bophelo ba mofuta ofe; ha ba eso fuwe boiph- . . . ha ba eso fuwe boiphihlelo boo ba tswalo-ya-bobedi, Ntho e o fetolang, e honyang bophelo. Jwaloka ho honya madi mothong, mme a ena le madi a mofuta, ebe o kenya mofuta o mong ka ho yena. Ke ho ntsha bophelo ba kgale mothong, le ho entela Bophelo ba Kreste ka ho modumedi, mme a fetoha mmopo o motjha. Ke mmopuwa e motjha.

⁶⁴ Jwale ke yona feela tsela eo re ka tsebang ka yona, mme ra kgotsofatsa batho bohole . . .

⁶⁵ Holane nka botsa e—e Mapentekosta, bosiusing bona, le nahana O loketse ho ba eng? Ba ka “Mo rata e le Mopentekosta.” Holane nka botsa e—e United Brethren se Mo tlamang; “Kgele, E ne e le leloko la United Brethren.” Holane nka botsa Methodise; “Kgele, E ne e le Methodise.” Baptise, le tse jwalo.

⁶⁶ Empa jwale mokgwa wa ho—ho kgotsofatsa hoo o mong feela, mme ke ho e sebetsa ho latela Lengolo. Jwale kamehla rea batla, kalaneng ena, ho tsepama le Lengolo hantle; haeba ho se jwalo, o tlamehile ho tla ho nna le—le ho ntokisa. Jwale, e hloka ho kgema le Mangolo.

⁶⁷ Ka hona tsela e le nngwe ho tseba seo A leng sona kajeno, ke ho fumana seo A neng a le sona. Wa bona? Hono, O boletse, “Yena maobane, kajeno, le ka ho sa feleng.” Mme ha re ka fumana seo A na a le sona, ke seo A tlamehang ho ba sona kajeno, hoba A ke ke a fetoha. Bibele e boletse, “Esale Yena,” e-s-a-l-e, “esale maobane, kajeno, le ka ho sa feleng.”

⁶⁸ Jwale ho Johanne wa Pele, kapa kgaolo ya 1 ya Mohalaledi Johanne, rea fumana mono. Ke sena seo mongodi a se boletseng, ya buduletswang ke Moya o Halalelang, o ngodile sena. “Lentswe le ne le le tshimolohong, Lentswe le ne le le ho Modimo, mme Lentswe e ne e le Modimo. Mme Lentswe le ne le etswe nama la aha hara rona.”

⁶⁹ Na nka le qhaholla? “Tshimolohong e ne e le Bosafeleng.” Ebile E ne e se le Modimo. Modimo, lentswe la rona la

Senyesemane *modimo*, ke e—ke “tlotla e rapelwang.” Empa, Yena, ho ne ho se letho ho Mo rapela. E ne e le Rabosafeleng feela.

⁷⁰ Ka ho Yena e le bokgethi. Mang le mang o a tseba bokgetheho keng. Ka mantswe a mang, mehopolo ya Hae e ne e ahile ka ho Yena, e le mehopolo feela, ke bokgetheho ba Hae boo. Yaba, eba Lentswe la Hae. Mme e—e mohopolo, ha o bonahatswa, ke Lentswe. “Lentswe le ne le le tshimolohong.” Le pele le ka bonahatswa, e ne e le mohopolo, bokgethi.

⁷¹ Ka hara monahano wona, E ne e tla ba Modimo. Mohlomong o bopile Mangeloi, pele, yaba O a kgumamelwa. E ne e le Modimo.

⁷² Mme, hape, ka ho Yena e le bokgethi ba ho ba Ntate, ho ba Mora, ho ba Mopholosi. Ha ho letho le timetseng; eka kgona ho be le ntho e timetseng, ka hona tsela ya hoo ya lokela ho hlophiswa. Ho ba mophekodi; ha ho letho le kulang, ka hona A lokela ho fumana ntho e kulang A tle a e fodise. E mpa e le ho pepesa bokgethi ba Hae feela.

⁷³ Mme jwale, hopolang, haeba o kile wa kgona, kapa o tla fumana Bophelo Bosafeleng le ka mohla, o bile le Bona le Yena mohlang oo. Wa bona, o bile le Bona le Yena. Hobane, Jesu o tlie, mme Jesu e be e le Molopelli. Ho *lopolla* ntho efe, ke, “ho e busetsa” moo e weleng e le teng kapa e tswang teng. Ho e *lopolla*, “ho e busetsa.” Mme wena, kamoo o shebehang, hore o mang, mang, lebitso la hao o mang, e ne e le mohopolong wa Modimo pele ho motheo wa lefatsho. Mme Jesu o tlie e seng ho pholosa ntho yohle; O ne a batlile jwalo, empa O tlie ho lopolla, ho busetsa ba neng ba dutse mehopolong ya Hae pele ho tshimoloho.

⁷⁴ Ke lona lebaka, E neng e le Lentswe le entsweng nama. Wa bona? “Modimo o ne o le ka ho Kreste, a kgutlisetsa lefatsho ho Yena.” Lentswe, monahano wa Modimo kamoo A tlang ho e etsa kateng, O ile a Iponahatsa ka ho Jesu Kreste. E ne e le Modimo a fetoha ntho e tshwarehang.

⁷⁵ Jwale, moo o leng teng jwale, o tlameha ho shwa, hobane le jwale o sa ntse... Jwaloka ho katlatsta senepe. Wena o seriti. Seriti se seng le se seng se tlameha ho kena phaposing e lefifi, se fete hara diesiti, ho hlatswa senepe, ho o bontsha seo se leng sona. Hona jwale re setshwanong sa Hae se pepesitweng. Ho katladitswe seriti, bophelo ba rona ke ba motho. Empa re tshwanelo ho kena tlung e lefifi, tlase lebitleng, ho feta hlatsueng, ho kgutla hape ka setshwantsho seo; oh, kgidi, ho ba motjha ka mehla, botsofadi bohle le dintho tsohle tsa di-... diphia le ntho ka nngwe di tla tloswa.

⁷⁶ Ebe re a lopollwa, bokgethi ba Modimo, ho kgutla hantle. Modimo, materiale, Kreste ka hara Kereke; jwaloka monna le

mosadi wa hae, ke hantle, Kreste le Monyaduwa. Hobane, e boela e lopolla, monahano wa Hae, mme monahano wa Hae o boela o pepeswa.

⁷⁷ Jwale o re, "Hoo ho nkile nako e telele." E seng ho Modimo. Rona re na le pheletso. Re tlameha feela ho potlaka.

⁷⁸ Ke ne ke nahanne. Ha ke tloha Jeffersonville, mme ke kganna ka dimaele tse mashome a mararo ka hora, ka kganna ke theohela Birmingham ka letsatsi le sekoto sa bosiu, mme ka hopola e sa ke letho ho nna. Empa hola kokwanyana e ka leka ho matha teng? E ka ba eng ho yona! Wa bona, e ke ke ya kgona leha e ka phela maphelo a dikete. Empa ho nna e ne e sa ke letho, hakaalo ho nna. Le reng ka sefofane? Le reng ka jete? E nto ba, moastronoto? Ento ba, mabapi le Modimo wona?

⁷⁹ Wa bona, Jesu o thakgisitswe thapama ya maobane, ho latela nako ya Modimo, hola A boloka nako. "Dilemo tse sekete ke letsatsi le le leng ho Modimo, di jwaloka sona." Esita di sa lekane le sona. Feel, "di jwaloka, letsatsi le le leng." Ena e batla eso be le veke, haeba o batla ho Mo balla nako, ntho yohle esale ho tloha tshimolohong ya hlollelo, ho e hodisa feela.

⁸⁰ Modimo le menahano ya Wona, o fetoha ntho e ka angwang, mme hoo ho re holahanya le Bophelo Bosafeleng. Mme Bophelo Bosafeleng, sebopoho sa Bona se seng feela, ke Modimo. Mme e ntano ba Modimo o bonahatswang kahara Kereke ya Hae, jwaloka Modimo ha o bonahetse ho Mora wa Hae. Ke Modimo o le mong ka dinako tsöhle. Modimo hodima rona; Modimo o na le rona; Modimo ka ho rona; ho busetsa ntho yohle hantle.

Jwale, "Lentswe le ne le le tshimolohong."

⁸¹ Jwale haeba re tliro bua ka ya tla ahlola lefatshe, kgele, o ka, motho a ka re...Ke utlwile motho wa Katolike, a re, "Modimo o tliro ahlola lefatshe ka kereke ya Katolike." Haeba A etsa, ka kereke efe ya Katolike? Wa bona, ba na le tse ngata tse fapanang. Ya Moshwelella, ya Segerike, kapa ya Maroma, kapa eng, wa bona, O tla ahlola lefatshe ka kereke efe ya Katolike? Be, haeba A le ahlola ka kereke ya Katolike, ekabeba Moprotestanta o ka thoko. Haeba A le ahlola ka kereke ya Protestanta, ekabeba Katolike e ka thoko. Haeba A le ahlola ka Methodise, Baptise e ka thoko. Be, o re, "Be butle, bohle ba..." Oh, tjhe.

⁸² Hopola, tshimolohong, ntho e le nngwe, nqalo e le nngwe e sirededitsweng, eo ya...eo Modimo a e neileng Adama le Eva, e ne e le ho dula ka mora Lentswe la Hae. Mme e seng feela ho...Satane ha a misbe...ha a re ho yena Le ne le se jwalo. O mpile a qotsa karolwana ya Lona e le nngwe ka phoso. Mme efela ha karolwana e hlasisitse bothata bona bohle, malwetse, dipelo tse bohlolo, le maswabi, karolwana e le nngwe e tla re beella ka thoko ho Lona.

⁸³ Modimo o tla ahlola lefatshe ntle le sehlotshwana sefe se itseng. O tla ahlola lefatshe ka Jesu Kreste, mme Kreste ke Lentswe. Ke Lentswe. “Lentswe le ne le le tshimolohong, Lentswe le ne le le ho Modimo, mme Lentswe e ne e le Modimo. Mme Lentswe le ne le etswe nama mme la aha le rona.” Ka hona Ke Lentswe la Modimo le bonahetseng mongwaheng o mong le o mong. Hoo ho Mo etsa yena maobane, kajeno, le ka ho sa feleng.

⁸⁴ Ho Iponahatsa, tshimolohong, le baporofeta. Jwale, hopola, baporofeta ke bona bao Morena a buang ka bona. Mme—mme jwale lemohang, O Iponahaditse ka hara batho, ho tloha tshimolohong, qalong ya nako.

⁸⁵ Ka mehla O na le tsela ya ho etsa dintho, mme ha A fetole tsela ya Hae le ka mohla. Ke lona lebaka nka dumelang Lentswe la Hae. Modimo ha o kile wa biletswa temeng ho nka kgato; mme qeto eo Modimo a kileng a e nka mohla A na a biletswa temeng, O tlameha ho itshwara ka ho tshwana nako le nako ha A biletswa temeng, ho seng jwalo O ile a itshwara ka phoso kgetlo la pele. Ka mantswe a mang, haeba A kile a bitswa ho pholosa motho, A mo pholositse hodima motheo o itseng; mme haeba A biletswa ho pholosa motho e mong, O tlameha ho sebetsa kamoo A sebeditseng kgetlo la pele, ho seng jwalo O e sebeditse ka phoso mohla A e sebetsang ka tsela ya pele. Haeba A biletswa temeng ho fodisa motho, mme A mo foidisitse hodima motheo o itseng; haeba A boela a bitswa ho fodisa, O tlameha ho fodisa hodima motheo o tshwanang, ho seng jwalo O sebeditse ka phoso. Mme Ke mohlokapeletso, motlalahohle, motsebatsohle. Ke—Ke Modimo mohlokapeletso, ka baka leo ha A fetoh.

⁸⁶ Jwale, rona re na le pheletso. Re ka re ntho *ena* e lokile, kajeno, ebe hosane re fumana ntho e fapaneng. Re ka ntlaufala. Re fumana ntho e ntlaufetseng, re aha matlo a ntlaufetseng ho feta dilemo tse lekgolo tse fetileng. Makoloi a rona a ntlaufetse ho feta a dilemo tse mashome a mabedi tse fetileng, mme dipalangwa tsa rona di ntlaufetse, leha ekaba eng eo le batlang ho kena ho yona. Re ntlaufala kahobane re ntse re ithuta.

⁸⁷ Empa haele Modimo tjhe, hobane O phethahetse, le ho qaleng. Ka baka leo, Yena le Lentswe la Hae ba bang, ka hona Lentswe la Hae le phethahetse. Haeba o sa dumele hoo, o se ke wa kena moleng wa thapelo le ka mohla, hoba ke wona feela motheo wa ho amohela letho. Tumelo e ka iphomolela feela hodima ntho e tiileng, mme tumelo ya makgonthe e iphomolela hodima Lefika la Bosafeleng la Lentswe la Bosafeleng la Modimo. Ha e ke e ritsa. E itulela mono, ho sa tsotelehe. Le bua ka lefika la Gibraltar? E ema hodima Lefika la Mengwaha. Lentswe le ke ke la fetoha le ka mohla, mme tumelo e iphomolela hodima Hoo. Ho thwe, “Mahodimo le lefatshe di

tla feta, empa haele Mantswe a Ka a ke ke a hloleha.” Banna le basadi ba kileng ba finyella letho, e be e le banna le basadi ba dumetseng hoo e le Nnete. Mme hoo ke Nnete. Yena, Lentswe, ke Nnete.

⁸⁸ Jwale re Mo fumana, tshimolohong, Modimo o abetse mongwaha ka mong Lentswe le lekana, ho o mong—mong le o mong mongwaha. Mme ereha ho fihla nako ya Lentswe leo hore Le senolwe... Le se fose taba ena. Ereha nako ya Lentswe leo ho senolwa e fihla, ka tlwaelo motho o le dubakantse, hofihlela A iponahatsa ho moporofeta. Le batlisise Mangolo. Wa bona? Jwale hopolang, Modimo o sa fetoheng, A ke ke a fetola ditsela tsa Hae. O tshwanelo ho e sebetsa ka ho tshwana nako le nako, ka ho se fetoheng.

⁸⁹ E reng ke le fe mohlala o le mong feela. Mohla motho a ne a sitwa, a etsa sebe, mme Modimo wa bitswa, e le ho mo dihela kahlolong kapa ho mo etsetsa tsela ya ho phonyoha. Jwale, Modimo, Tshimong ya Edene, o entse leano le le leng ho pholosa motho, tsela e le nngwe, mme e le ka Madi a tsholotsweng a tlota e se nang sekodi. Ha A eso e fetole. Re lekile ho haha metse, ditora, ho rupella, ho rala bodumedi, empa e hlolehile. Modimo a ka kopana le motho feela tlasa Madi a ya se nang Sekodi. O entse hoo Tshimong ya Edene, mme ha A eso e fetole.

⁹⁰ Mme Modimo le ka mohla ha o fetole ditsela tsa Wona. Yena, haeba A etsa, ekabeba Ke mofelli ya kang nna, wena o jwalo. Re re, “Be, ke ne ke fositse *mono*, empa ke—ke tla nepa lekgetlong lena.” E sang Modimo. Lekgetlo la pele feela O nepile. Ha A hloke ho fetola letho. O entse tshepiso, mme Ke Modimo, O dula le yona.

⁹¹ Jwaloka Abrahama, o kile a kgodiseha ruri hoba Modimo o tsebisisa ho phethisa sohle A se tshepisitseng, ka baka leo a bitsa sohle se kgahlano le Lentswe eka hoja se le siyo. A mpa a tswelapele ka ho tshwana, kgahlano le mahlale, dikgodiso tsa mahlale, le kgahlano le mabaka, kgahlano le tshepo, kgahlano le sohle se neng se le teng. Lentswe la Modimo le tla pele. Abrahama o itse, “Sohle se fosahale.” O tlilo fumana lesea, leha ho le jwalo. Mme ka hona a le fumana, wa bona, hoba o e dumetse.

⁹² Jwale rea fumana, ke hona, hobane Modimo o sa fetoheng o sebetsa ka ho tshwana ka mehla. Jwale lemohang, ka bokgutshwane, mehleng ya nalane ya nako. Tsamayang le nna jwale, metsotso e mmalwa feela e latelang. Ha re kgutleng mme re fumane.

⁹³ Tshimolohong O buile le baporofeta, mme Lentswe la Morena le tlie ho moporofeta. Mme moporofeta, ka ho ba le bokgoni ba ho lepa, dintho tse halalelang, mme e ntano hlaha jwalo, e ne e le boitsebiso ba hae boo. Moporofeta, *seboni*, ke

ho bolela, "ya lepang kapa ya bolelang esale pele," mme hape ke "motoloki ya Halalelang wa Lentswe le ngodilweng." Mang le mang o tseba seo, ya tsebang seo moporofeta a se bolelang.

⁹⁴ Jwale lenseswe la Senyesemane, *moporofeta*, m-o-p-o-r-o-f-e-t-a, le bolela, "mmoledi," mang feela ya rerang.

⁹⁵ Empa seboni sa Testamente ya Kgale, se neng se bitswa moporofeta, se ne se bona dintho esale pele. O itse, "Ekare ha e mong a le teng hara lona e leng motho wa moyo, kapa e leng moporofeta, Nna Morena ke tla Itsebisa yena. Mme ekare ha seo a se buang se hlaha, le mo utlwé; empa ekare ha se sa hlaha, le se ke la utlwá moporofeta eo, wa bona, hobane o iporofetela bohata. Empa haeba Ke mo romile, boo etlaba boitsebiso ba Ka, see a se buang se tla hlaha. O tswetswe lefatsheng, o tlotsitswe, o kgethilihwe ke Modimo ho etsa hoo." Hobane, "Dineo tsohle le dipitso ha di hlahiswe ke pako." Di kgethilihwe ke Modimo esale pele.

⁹⁶ Le pele lefatshe le simolla, O tsebile sohle ka lona. O tsebile letsetse ka leng, ntsintsi ka nngwe, le hore e tla bopa tshotso e kae, le hore e tla tabanya mahlwana a yona ha kae. Eo—eo ke mohlakapheletso, wa bona, mohlokapheletso. Hoo feela ke...Efela haeba e se jwalo, E ka be e se mohlokapheletso. O tsebile ntho ka nngwe. Mme O a...O omni-ent hape ke motsebatsohle. Ka hobane E le motlalahohle, hoo ho etsa...Ho ba motsebatsohle ho Mo etsa motlalahohle. O tseba ntho ka nngwe, ho e tseba le pele lefatshe le simolla.

⁹⁷ O tsebile, le pele lefatshe le qala, re tla dula mona. O tsebile ke tla phahamisetsa matsoho a ka hodimo-le-tlase ha kae. Jwale O tsebile mantswe ao ke tlangu ho a bua. O tsebile na o tla tabanya mahlo a hao ha kae, le seo o tlangu ho se nahana, le pele lefatshe le simolla. Ebe re ka tshabang? Modimo ke Ntata rona. Ke hantle. Ke Ntata rona. Ha re tshwenyehe. Batho ba se ba lahlehtswe ke tumelo ya bona le tshepo ho Yena.

⁹⁸ Mme hoo re ho fumana ho tswella ka dihla, mme re ntano fumana Mantswe ao Modimo a boletseng ho hlaha. Mme ebe bohole ba dubakana; mme ebe Modimo o romela moporofeta sebaeng, mme moporofeta eo o netefatsa Lentswe leo la mongwaha oo, ka mehla. Ako haole le Mengwaha ya Kereke, seo re tlamehang ho se fumana, ho bona haeba o sa fumane setshwantsho sa monna eo ho theoha le Mengwaha ya Kereke ka moo re ba bonang, ho tloha ho—ho baapostola. Jwale lemohang sena, hape.

⁹⁹ Modimo o buile le Nowe, mme yena e le moporofeta, a mmolella se tlangu ho tla. O ne a porofete, mme ya etsahala.

¹⁰⁰ Jwale ho latela Josefa. Josefa, mohlala e phethehileng, e ne e le Kreste ka ho Josefa. Kgele, wa lemoha, o ne a ratwa ke ntatae, a kgeswa ke banababo, hoba e ne e le seboni. Ba mo hloile, lebaka le le siyo. Monna a ke ke a thusa letho, seo a

neng a le sona o ne a le sona. Mme baena ba bang ba mo hloile, mohlala o iphotlileng wa mengwaha yohle. Ka mehla, enereha seboni se hata temeng, ba bang bohole ba mo hloya, ka lona lebaka le kang la Josefa. A ke ke a thusa letho. O ne a re... O kgonne ho kwaholla ditoro tsa bona; a sa fose le ka mohla. A—a bolela dintho esale pele; a sa fose le ka mohla. Mme banababo ba mo hloya, lebaka le le siyo.

¹⁰¹ Mme, lemohang, bophelo ba hae bo re betletse Kreste, ka nepahalo. O bile a rekiswa, bonnyane, ka dikotwana tse mashome a mararo tsa silifera, a nyollwa lemeneng; mme a emiswa letsohong le letona la Faro, musisi wa lefatshe letsatsing leo. Mme enereha a tloha paleising, ba ne ba letsat terompeta, mme ho thwe, "Lengole ka leng le kgumame, hobane Josefa o a tla." Papiso e phethehileng ya Kreste Dilemong tse Sekete; mohla terompeta e tla lla mme ba... O tla hlaha, mme lengole ka leng le tla kgumama le leleme ka leng le tla Mo bolela.

¹⁰² Lemoha, tjhankaneng ya hae, e ne e le moporofeta. Ke mohla a rekiswang mme a hlahllewa tjhankaneng, ka baka la mosadi wa Potifaro. Mme ka mono re fumana mmolayi le moapehi, ba lora ditoro, mme a kwaholla toro, mme e mong a timela le e mong a bolokeha. Le jwalo Jesu sefapanong, ka nepahalo; e mong a timela, e mong a bolokeha, mohla A leng tjhankaneng ya Hae, a totometswe Sefapanong. Mohlala o phethehileng ruri.

¹⁰³ Re fumana Moshe mohla a hatang temeng jwale, jwale, Moshe a ke ke a fihla ka moyo o tshwanang kapa ka tsela e tshwanang, ka molaetsa oo—oo Nowe a kileng a o tshwara. E ne e le mongwaha o mong, ho phethahatsa lenseswe le leng. Modimo o itse, "Peo ya hao e tla jaka naheng esele, e be e—e mohlanka dilemo tse makgolo a mane, ke moo Ke tlang ho ba ntsha ka letsoho le matla." Empa ya na ya re mohla Moshe a bitswang; a hulana dilemo tse mashome a mane tsa thupello, ha ntano qosa dilemo tse ding tse mashome a mane ho e honya ho yena kaofela hape, yaba Modimo o mmitsa ka Lesedi le mohlolo, Topallo ya Mollo e leketlileng morao sehlahleng se tukang. Mme a tseba haholo ka Modimo, metsotsong e mehlano, ho feta seo a ithutileng sona dilemong tse mashome a mane, hoba o ne a kene ka pela Sefahleho sa Hae. Ke seo ke...

¹⁰⁴ Monna ha a kena ka pela Sefahleho sa Modimo, eba o tseba ho hong. O tseba ho hong.

¹⁰⁵ Tjhe, a ke ke a ithuta ka dibuka. O ke ke wa ithuta Modimo ka dibuka. Thuto e nka... O re, "Ke D.D.D., Ph.D." Hoo ho mo sutuletsa hole le Modimo ha kaalo, ho nna. Ha o tsebe Modimo ka thuto.

¹⁰⁶ O tseba Modimo ka tumelo, mme o dumela ho Yena. O tseba Modimo jwalo. Mme, leha ho le jwalo, ke ka hona ke nahanang

dikopano tsa rona, ka pela Sefahleho se Kgethehileng sa Modimo, e tlamehang ho kgesa tumelo ya batho ho tseba seo; ho sa tsotolehe mahlale a reng, seo bomosadumele ba se buang. Kreste o romeletswe lona, badumedi. Le na le tokelo ya ho thabela setswalle sa Hae le mahlohonolo a Hae, le ntho ka nngwe A e shwetseng. Ke moo he.

¹⁰⁷ Ha ho monna a nang le tokelo ya ho bolela Evangedi pele a kgumama mahlabatheng a kgethehileng ao motsheo koo ka pela Sefahleho sa Topallo eo ya Mollo, mme a utlwile Lentswe la Modimo le bua le yena. O a tseba, madumedi kajeno a ka e hhalosetsa hole kaofela, “Mme ho etsahetse *hona*, mme Hoo ho fetile. Mme Hona ho be ho etseditswe mongwaha o mong, le *hona*.” Empa monna a kileng a kopana le Modimo, sefahleho le sefahleho, mme a buile le Yena, ha ho ramahlale kapa ha ho diabolosi, kapa le letho, le ka hatang mobung o kgethehileng oo. O ne a le teng mohla a kopanang le Modimo, mme o tseba seo a buang ka sona, mme motho ha a hloke ho leka ho mmolella letho.

¹⁰⁸ Modimo o bua mengwaheng, ka baporofeta ba Hae, ho Iponahatsa nako le nako ho mongwaha o fihlang.

¹⁰⁹ Jwale yaba ho fihla Jesu wa Nazaretha. E ne e le moporofeta, le yena. Bibele e Mo tlalehile a tla etsa hoo. Deutronoma 18:15, Moshe o boletse, “Morena Modimo wa lona o tla hlahisa moporofeta ya jwaloka ka nna, mme batho ba tla utlwa yena.”

¹¹⁰ Jwale lemohang mongwaha ka mong, Iseraele yohle, batho bohole ba dumetse hoo, baporofeta, mohla baporofeta bao ba ne ba tsebahatswa. Baheberu leshomethar- . . . Baheberu kgaolo ya 1, e boletse, “Modimo, mehleng ya boholoholo o buile le bontate ka ditsela tse ngata ka baporofeta; mehleng ena ya qetelo, ka Mora wa Wona Jesu Kreste.” Wa bona, ka Mora wa Wona Jesu Kreste. Lemohang, ha a fetole tsela ya Hae le ka mohla; e a tshwana, ke tswelliso ya Lentswe la Modimo ka mehla. Modimo ha o eso sebedise tsamaiso, ha o eso sebedise mokgatlo, ha o eso sebedise dihlopha. O sebedisa motho a le mong to.

¹¹¹ Haeba o le Methodise, Baptise, hoo ho itoketse; Presbeteriene, Pentekosta, ho hotle; empa Modimo o sebetsana le wena ka bomong. Ke wena, e seng kereke ya hao. Ke wena ya jereng boikarabelo, ha se seo kereke ya hao e se buang. Ke seo Modimo a o boleletseng sona! E tshwanelo ho kgema le Lentswe. E, Modimo o sebetsana le batho ka bomong. Esale A etsa jwalo.

¹¹² Baporofeta, ha ho sekolo sa baporofeta. Ba kile ba se leka ka mohla o mong mme sa thisa. Ka hona ba fumana hobane, Akabe o ba a bolokile sehlopha sa bona tlase mono. Empa Modimo a ena le a le mong, le yena, a bitswa Mikea, a hloilwe ke ba bang bohole, empa a tshwere Nnete ka hona a tshwere nnete ya Lentswe, hobane boporofeta ba hae bo ne bo ipapisitse le Lentswe.

¹¹³ E tlamehile jwalo ka mehla. Moporofeta o romilwe ho netefatsa Lentswe le baletsweng letsatsi leo.

¹¹⁴ Jwale ba sitilwe jwalo hantle ho bona Jesu. Ke hantle haholo. Shebang monna eo, Bafarasi le Basadusi bao, baithuti bao re se nang bona kajeno. Ba tshwanela ho tswalwa ka ho ikgetha, ba tswa morabeng o ikgethileng, Levi. Bontata bona moholo-holo-holo-holo e ne e le baprista, mothapo wohle jwalo. Ba ithutile Lentswe leo, motsheare le bosiu, motsheare le bosiu. Empa mohla Lentswe le ne le netefatswa, ha ba e tseba. Wa bona, ba ne ba bolokile moetlo. Jesu o itse, “Lona ka meetlo ya lona le fetotse Lentswe la Modimo ntho e se nang matla.” Jwale, O fihla hantle ka moo moporofeta a boletseng A tla fihla, empa, wa bona, ba ne ba tshwere moetlo mme ba sitwa ho bona Seo.

¹¹⁵ “Lesea lena le hlahetse tlase mane, tswalo ya bonyatsi, setaleng sa dikgomo, e ka ba yona jwang? Mme thaka lena ha lea kena sekolo sa letho. Le ne le se na ditshwanelo. Le ne le se na setlankana sa botho. E ne e se setho sa mokgatlo ofe. Ha ba tseba sekolo A se keneng. Ekaba letho jwang?” Empa e ne e le lona. Ba sitilwe ho bona.

¹¹⁶ A re, “Mesebetsi eo Ke e etsang, e paka ka Nna. Batlisisang Mangolo, hoba ho Wona le nahana le na le Bophelo Bosafeleng; athe ke Wona A pakang, ho le bolella na Ke Mang. Wona ke dipaki tsa Ka, Mangolo.” Ho re, “Ha le sa dumele ho Nna, le dumele mesebetsi eo Ke e etsang. Ke yona e bolellang ha Ke Mang.”

Ba re, “Re na le Moshe. Re dumela Moshe.”

¹¹⁷ Ho re, “Hola le dumetse Moshe, le ka be le dumetse ho Nna; o ngodile ka Nna.” Wa bona?

¹¹⁸ Ba ne ba fifetse ha kana, mme le jwale keha ba sa kgone ho e bona. Kea ipotsa na e ke ke ya ipheta na? E porofetilwe jwalo, wa tseba. È porofetilwe ho etsa hoo, mono.

O re, “Letsatsing lee?” Oh, ee.

¹¹⁹ “Bakaki, baikakasi, ba ratang menate ya nama ho feta ho rata Modimo, ba se nang ho tshepeha, baetselletsi, ba sa tsebeng ho itshwara, ba hloyang ba molemo, ba nang le sebopheho sa borapedi, empa ba latola Matla a jona; le ba jwalo o ba furalle.” E porofetilwe, mme boporofeta bohole bo tlameha ho phethahatswa. Kea ipotsa na re atametse nako eo. Ke ipotsa feela na re mono na. Ha re qamakeng nakwana mme re boneng na re iketlile ha kae Sione. Jwale rea fumana.

¹²⁰ Ha re boneng seo Jesu a na a le sona, mohla A fihlang. E ne e le Lentswe. E ne e le Lentswe ka bottlalo. Mme ka mehla Lentswe le a lokisa. Le lokisa phoso. Leha kwana phoso e sa dumele, ka dinako tse ding, empa Lentswe le lokisa phoso.

¹²¹ Shebang Jesu, mohla dilemo tse leshome le metso e mebedi; moshanyana ya kang thaka lena le dutseng mona le kgalehile,

le tlamileng disamente meomong ya hae. Jesu e ne e—e le moshanyana, a ka ba dilemo tse leshome le metso e mebedi; ha ho rekoto moo A keneng sekolong. Empa ba kile ba nyolohela Moketeng wa Paseka, mme eitseha ha ba... kapa Mokete wa Pentekosta, ke rialo. Mme ba nyolohela moketeng, Josefa le Maria, le phutheho yohle e tswang tlase motseng. Ba ne ba ye Jerusalema. Le leeto la matsatsi a mararo, ba hopola A ena le batho le batho ba bang ba habo mono. Empa ba Mo hloka. Ba tloha ba batla, mme keha A le siyo. Ba boela Jerusalema mme ba Mo fihlela ka tempeleng, a tsekisana le baprista, a tsekisana le monna eo.

¹²² Lemohang mona, ha se ho thonkga lona batho ba Katolike. Empa lona ba nkang Maria e le modimotsana kapa mmuell, shebang mona. O kile a paka, mo shebeng ha a ahlola bopaki ba hae ka sebele. O itse, “Nna le ntate wa Hao esale re O batla, ka makgapha.” Shebang seo a se entseng. A ahlola bopaki ba hae ka sebele. A bitsa Josefa ntate wa Hae.

¹²³ Empa shebang. Mothaka feela, moshanyana feela, empa ka mehla Lentswe le lokisa phoso. Ho re, “Na ha le tsebe Ke tshwanetse ho ba mosebetsi wa Ntate wa Ka?” Lentswe ka boitaolo, wa bona, le lokisitse phoso.

¹²⁴ O itse, “Nna le ntate wa Hao,” Josefa. Hantle ka pela baprista bao, bao a ba boleletseng a emodisitswe ke Moya o Halalelang, mme mona o a paka mme o tlaleha Josefa e le ntate wa Hae, o ntse a ahlola bopaki ba hae ka sebele.

¹²⁵ Empa shebang ha Lentswe le e thonaka. E ne e le Lentswe. “Lentswe le ne le le tshimolohong, mme Lentswe le ne le le ho Modimo, mme Lentswe e ne e le Modimo. Mme Lentswe le ne le etswe nama la aha hara rona.” Lentswe la e qhautsa, ho lokisa phoso.

¹²⁶ “Na ha le tsebe Ke tshwanetse ho ba mosebetsing wa Ntate wa Ka na?” Holane Josefa e le ntate wa Hae, a ka be a le tlase koo levenkeleng la mmetli, mosebetsing wa hae. Empa mosebetsi wa Ntate wa Hae e ne e le ho qosa mekgatlo eo le dintho, mme keha A ba qosa hodimo mono, moo A—moo A na loketse teng. A iphile e—e nako mono, ba bile ba sa utlwisis moshanyana enwa a ka tseba tse jwalo jwang. Empa E ne e le Lentswe. Ha ho motho ya kileng a bua jwaloka Yena. Seo A se buileng, A bile a ena le matla a ho se etsahatsa.

Baporofeta bao ba entse hoo, le bona, hobane ba phetse horeng eo.

¹²⁷ E ne e le yena, E—E ne e le baporofeta bohle ba etswe Bonngwe, kopanya le hoo hape, hoba E ne e le bottlalo ba Lentswe. E ne e le Lentswe lohle. Baporofeta e ne e le Lentswe la mongwaha oo feela, empa E ne e le Lentswe la mengwaha

yohle. E ne e le Modimo, ka Boyena, ya theohileng mme a bonahatswa ka mmele wa nama. “Lentswe le ne le etswe nama mme la aha hara rona.”

¹²⁸ Ha re Mo shebeng o Itsebisitse jwang na, Yena pele, hoba A tswe feelleng, a tswa kolobetswa ka Moya o Halalelang. Ho kolobetswa, le Johanne... Mohopolwana o mong o ka o tshwarang ke ona le pele o nahana ka yona.

¹²⁹ Na o a tseba Bibebe e re, “Lentswe le tla ho moporofeta”? Ekare ha moporofeta a le teng naheng, Lentswe le tlameha ho tla ho yena.

¹³⁰ Shebang Johanne, e ne e le moporofeta, wa pele eo ba kileng ba mo fumana, wa bona, mme e ne e le moporofeta wa Lentswe. Mme enere a sa eme mono, a ntse a porofeta, Lentswe la tla ho yena ka metsing. Jesu e ne e le Lentswe, o ile a tswa metsing hantle. Mme Johanne a re, “Ke nna ke tshwanetseng ke kolobetswe ke Wena. Mme O tla ho nna na?”

¹³¹ Mme A re, “Ntumelle jwale, hobane eka kgona re phethe jwalo ho lokelang hohle.” Hobaneng? Johanne kaha e le moporofeta, mme Yena e le Lentswe, a Mo tseba hore ke Sehlabelo, ka hona Sehlabelo eka kgona se hlatsuwe pele Se lhahiswa. Ka hona a kolobetsa Jesu, ho hlatswa Lentswe, pele Le lhahiswa, wa bona. Ka hona a kol... A re, “Ntumelle jwale, hobane eka kgona re phethe ho lokelang hohle.”

¹³² Eitse hobane a Mo dumelle, Jesu a tswa metsing. Mme, bonang, mahodimo a phetlwa, mme a bona Moya wa Modimo, eka leeba, o theohela hodima Hae. Mme yaba O kena feelleng, a lekwa matsatsi a mashome a mane, a ntano tswa.

¹³³ Ha re saleng tshebetso ya Hae morao jwale. Re mona ho Mohalaledi Johanne 1. Ha re shebeng se etsahalang, mme re bone seo A na a le sona mohlang oo, re ka fumana seo A na a le sona jwale, ke hona. Mo shebeng morao mengwaheng, jwale, re fihlide mehleng ya Jesu.

¹³⁴ Re ntano kwala, mohlomong re tla e thonaka hosane bosiu, mono. Re saletswe ke metsotso e mmalwa feela.

¹³⁵ Ke enwa A fihla, a tswa feelleng. Ntho ya pele, ha fihla monna ka lebitso la—la Andreease. Esale a etela molaetsa wa Johanne. Mme yaba Johanne o qala a re...

¹³⁶ Johanne o tsebile e tla—tla ba motumisi wa Messia, hoba o se a boletse, wa tseba. Ntate wa hae—hae e ne e le moprista, empa a se ke a latela ntatae. Mosebetsi wa hae o le bohlokwa haholo ho ka kenela dithupelo tsa thutamodimo, ka hona a kena feelleng a le dilemo di robong. O tsebile a tlameha ho tsebisa, a tlameha ho bona pontsho e tla paka na—na Messia eo ke mang. Mme o e tsebile a kgodisehile, o tsebile pitso ya hae, a tiile ka yona, a ba a ema hara sehlopha sa batho ba tjena, a re, “O eme hara lona jwale. E Mong o teng ya emeng hara lona,

eo le sa Mo tsebeng. Ke Yena ya tla le kolobetsa ka Moya o Halalelang le ka Mollo." Ho re, "Eo ke sa lokelang le ho lokolla dieta tsa Hae."

¹³⁷ Mme yaba, ntho ya pele, Jesu o a tswa, mme a bona pontsho eo. A re, "Ke bone pontsho, mme ke tiile hoba e ne e le Yena." Mme yaba o a Mo kolobetsa. Jwale yareha Jesu . . .

¹³⁸ Mme ntle le pelaelo Andrease o na boleletse ngwanaboo. Jwale, moena wa hae a batla a . . . Simone, e batla e le thaka lena le thata le sa batleng ho dumela letho. A re, "Ke hopola seo ntate a mpoleletseng sona, o na re, 'Mora,' tsatsi le leng o na re, 'wa tseba, esale re tshwasa dihlapi, mme ra tshepa Modimo ho—ho re fa hlapi, ho lefa melato ya rona le ho fumana dijo." A re, 'Hangata ra lokela ho rapela, kgale le pele mme a eshwa le bohole, ho re thusa ho tshwasa hlapi e ntle, re tle re fumane dijo tsa letsatsi. Mme esale ke lebeletse, jwaloka Moheberu ofe wa makoma, ho fihla ha Messia.' Ho re, 'Jwale kea tsofala, mme kea kgolwa nke ke ka Mo bona. Empa ke batla lona bashanyana le tsebe, pele A hlaha temeng, ho tla hlaha mafuta ya dintho tsohle tsa bohata, wa bona, empa ke batla le tsebe, re tshwanetse ho tshepa Lentswe. Moshe moporofeta wa rona o re boleletse, ho re, "Morena Modimo o tla hlahisa moporofeta." Jwale esale re hlokile moporofeta dilemo tse makgolo le tse makgolo. Empa mohla Messia a fihlang, E tla be e le moporofeta ya tsebahaditsweng. Jwale, le tla Mo tseba, hoba E tla be e le moporofeta."

¹³⁹ Mme yaba thaka lena lea rera, a sa etse letho haese ho rera, Johanne. Ka hona yena, Simone, a ke ke a nkana le ntho eo.

¹⁴⁰ Ka hona a mmolella a re Enwa eo a buileng ka yena o fihlile, ka hona hoo ho Mo tsebahaditse e le moporofeta, wa bona, ho re Yena . . . se neng—se neng se hlahile.

¹⁴¹ Ka hona Andrease le Simone ba theoha tsatsi le leng, mme ba ntse ba hlatswa matlowa a bona, mme yaba ba theoha ho bona Jesu. Mme yareha Simone a fihla, a kena ka pela Sefahleho sa Hae, Jesu a mo tadima mme a re, "Lebitso la hao o Simone, mme o mora Jonase." Yaba ke phetho. A tseba hona hoo e ne e le Lentswe leo le entsweng nama. Wa bona, o e tsebile.

¹⁴² Hobaneng? Baheberu kgaolo ya 4, temana ya 12, e tsejwang ke baithuti bohole, ho re, "Lentswe la Modimo le bohale le fetisa sabole e leoditsweng ka nqa tse pedi, mme le ahlolaa mehopolo le merero ya pelo." Ke babadi ba bakae ba tsebang hoo? [Phutheho e re, "Amen."—Mong.] Hantle. Baheberu 4, ke hantle, 4:12.

¹⁴³ Jwale, eitseha a bona seo, a tseba hoba ha A tseba feela na e ne e le mang, O tsebile ntatae ya lokileng eo, le yena. A tseba hona moo e ne e le Messia. O ile a fuwa dinotlolo tsa Mmuso, ha morao.

¹⁴⁴ Ho ntano ba le mothaka ya emeng mono, ya bitswang Filipi. Ka hona o ne a tlwaetse ho bala Bibele le mothaka e mong, oh, dilemo tse ngata, mme yena e le mothaka ya bitswang Nathanaele. A ahile dimaele tse ka bang leshome le metso e mehlano, ha o sheba mmapeng, moo a ileng teng, a potela ka leralla ho lata Nathanaele. Mme eitseha a mo fumana... E ne e le—e ne e le monna wa tshimo ya difate. O ne a lemme difate tsa mohlwaare, mme a le tshimong eo, a rapela. Mme, ehlide, Nathanaele, ka morao... kapa Filipi, ntshwareleng. Filipi, hoba a bone Nathanaele a rapela, e ne e le monna wa mekgwa, a mo emela ho fihlela a qeta ho rapela. Yena, eitseha a ema, a re, “Kgidi! Tloo, bone Eo re mo fumaneng! Jesu wa Nazaretha, mora Josefa, enwa ke—enwa ke Messia eo re buang ka yena.”

¹⁴⁵ “Oh!” Jwale mamelang mothaka enwa. Ho re, “Jwale, ntho e molemo e ka tswa sehlopheng se jwalo sa batho, ho bona?”

¹⁴⁶ Mme ke kgolwa a mo arabile ka tshwanelo e fetisisang ya mang. Ho re, “Tloo o bone.”

¹⁴⁷ O se—se dule hae wa nna wa nyatsa. Tloo iphumanele ka bowena. Tloo o nkile Lentswe la hao, ere re e batlisise re fumane na ke’ng. O tseba seo Lentswe le bolelang Messia enwa e tla ba sona. Seo A na le sona maobane, O sona kajeno. Batlisisa Lentswe, fumana se A leng sona. Na Ke mokgatlo, na Ke sehlopha sa batho, Ke eng? Wa bona?

¹⁴⁸ Ka hona re ba fihlela ba theoha ba potela ka leralla, mme ntle le pelaelo Filipi a mo phetela seo A se buileng. “Be, motshwasi eo wa kgale wa dihlapi a na se na thuto e lakaneng ho tekena setlankana seo, mohla a fumanang hlapi eo, O mmoleletse na ke mang le ntatae na e be e le mang. Nke ke ka makala ha A ke ke a o bolella na o mang, ha o fihla mono.”

“Oh, tswelapele! Ke tlameha ho e bona,” a rialo.

¹⁴⁹ A tsamaya a fihla ka pela Sefahleho sa Hae, mohlomong tjena, mola wa thapelo, e ka bang eng. Jesu a ntse a rapella bakudi. Mme Jesu ha a mo tadima, kgetlo pele A mmona, A re, “Bonang Moiseraele wa sebele eo ho seng mano ho yena.”

¹⁵⁰ A re, “Rabbi,” ke hore moruti, “O kile wa mpona kae? Ke kgetlo la pele lena ke O bona. O kile wa mpona kae?”

¹⁵¹ A re, “Le pele Filipi a o bitsa, o sa le tlasa sefate, Ke o bone.” Oh, leihlo le le kakang!

¹⁵² Shebang ntho—shebang ditlamorao. “Rabbi, O Mora Modimo. O Morena wa Iseraele.” Monna eo o tsebile...

¹⁵³ Shebang phapang dipakeng tsa hae le baprista bao ba emeng ka ntle koo. Baprista bao keha ba sa e dumele, mme ba tseba e etsahetse, keha ba tlameha ho arabela phutheho ya bona. Ka hona le tseba seo ba se buileng? Ba itse, “O etsa... Ke senohe-ramahlohonolo. Ke Belsebule, diabolosi. Ke diabolosi.”

¹⁵⁴ Mme Jesu o boletse, “Ke tla le tshwarela hona,” pheko e ne eso etswe, “empa mohla Moya o Halalelang a fihlang,” jwale, “mme a etsa hoo, lentswe kgahlano le Wona le ke ke la tshwarelwa lefatsheng lena kapa lefatsheng le tlang ho tla.” Ka hona le bona moo e ka re lahlelang teng hola re ka bona ntho yona eo! Wa bona?

¹⁵⁵ Jwale re kgatha tema nakwana. Rea fumana, ke hona, dihlopha tsa batho di tharo feela lefatsheng, merabe e meraro. Re tseba seo. Kama, Sema, le batho ba Jafeta; eo ke Mojuda, le Mosamaria, le Moditjhaba. Jwale, Mosamaria ke motswako wa Mojuda le Moditjhaba.

¹⁵⁶ Jwale re tseba Bajuda ba ne ba lebeletse Messia, Basamaria le bona. Empa rona Baditjhaba re be re le maAnglo-Saxon, re—re rapela diseto, re jere melamu mekokotlong ya rona, mme re le bahetene. Re ne re sa labella Messia wa letho. Mme re sa bontshwa Messia wa letho, le hona, pontsho ya Hae e le siyo. Re bone monna ya tsamayang, empa e seng pontsho ya Messia.

¹⁵⁷ Empa Samaria ke eo. Ka baka leo Jesu, ka mohla leetong la Hae le theohelang Jeriko, a potela ka thaba, “a hloka ho pota le ka Samaria,” yaba O fihla motseng o bitswang Sikare. E ka ba motsheare o moholo, tulo e kang ena mona. Mme A ya sedibeng a dula fatshe, mme—mme a roma barutuwa ho fumana diyakamaleng, dijo.

¹⁵⁸ Mme ba sa le mono, mosadi, mosetsana wa motse, a batla a le setumo se sebe, a le banna ba bangata haholo, a tswela sedibeng. Kaha, a ke ke a tla le basadi ba bang, hobane, e sa ntse e le moetlo, ha ba tswakane. Ka hona a tswa a tlilo kga metsi. Mme yare a sa theola e—e nkgo ya metsi, ka kgole, ho kga metsi, a utlwa lentswe la Monna le re, “Mosadi, Mphe metsi.” Yaba o a qamaka, mme keha e le Mojuda. Mme yena...

¹⁵⁹ A batla a hodile ho feta dilemo tsa Hae. A shebeha a hodile ho feta ka moo A na le kateng. Wa tseba, ba boletse ho Mohalaledi Johanne 6 mono, ho re, “O Monna ya seng ka hodima dilemo tse mashome a mahlano, mme O boletse o bone Abrahama? Rea tseba O na le motemona.” A re, “Le pele ho Abrahama, Ke teng.” Ka hona, empa, Yena, mosebetsi wa Hae—Hae wa Mo etsa e ka o pudufatse hanyenyane, kapa ntho e nngwe. A batla a le dilemo tse mashome a mararo a metso e meraro feela, empa A shebeha a hodile ho feta moo.

¹⁶⁰ Ha thwe, “Wena bo, O le Mojuda, mme o kopa nna mosadi wa Samaria? Re na le kgethollo. Ha ho letho O... Re ke ke ra etsa hoo. O ke ke wa kgona, ha o a lokela ho etsa hoo.”

¹⁶¹ A re, “Holane o tsebile Ya buang le wena, o ne o tla kopa metsi ho Nna.”

¹⁶² Ebe O ne a etsang? A qhoba moqoqo. Ntate o ne a Mo romile mono, empa O ne a... Mosadi e ne e le enwa; e loketse

e be e le nako. Ka hona A rialo, A bua le yena mme A hokana le moyo wa hae, a bona. Wa bona, Lentswe le senola mohopolo o ka pelong, mme E ne e le Lentswe. Ba ba kae ba dumelang E ne e le Lentswe? [Phutheho e re, "Amen."—Mong.] Ehlide. Wa bona? Mme Lentswe le senola mehopolo e ka pelong. Wa bona?

¹⁶³ A rialo, a fumana bothata ba hae. Bohle rea bo tseba; banna ba bangata haholo. A re, "Ya lata monna wa hao le tle kwano."

A re, "Ha ke na monna."

¹⁶⁴ Ho re, "O boletse teng. O bile le ba bahlano, le eo o dulang le yena jwale ha se wa hao."

¹⁶⁵ Shebang mosajana eo. Wa bona, o ne a wele mehopolong ya Modimo. A ka lopollwa. E ne e le moahi. A ena le kemelo Lehodimong. A retoloha.

¹⁶⁶ Shebang phapang dipakeng tsa hae le bareri bao, baprista ba hae. Bareri bao, eitseha ba e bona, ba re, "Be, monna enwa ke senohe-ramahllohonolo." Ba ne ba sa tsebe Lentswe.

¹⁶⁷ Shebang seo a se buileng. "Rea tseba. Monghadi, O loketse o be o le moporofeta. Re hlokile e mong ka makgolo a dilemo. Mme rea tseba, mohla Messia a fihlang, ke sona see A tla se etsa." Oh, kgidi!

¹⁶⁸ A ka—a ka ruta Birmingham ntho e nngwe. A ka ruta lefatshe lohle ntho e nngwe. E, monghadi. A ka ruta dikolo tsena tsa thutamodimo ntho e nngwe. Wa bona? "Yena maobane, kajeno, le ka ho sa feleng." Shebang, re . . .

¹⁶⁹ "Monghadi, kea lemoha O moporofeta." Wa bona, O badile mehopolo e pelong ya hae. A re, "O tshwanetse o be o le moporofeta. Rea tseba, rona Basamaria. Re lebeletse hoo. Messia o tla fihla. Re hlokile moporofeta dilemo tse makgolo a mane. Malakia e bile moporofeta wa rona wa ho qetela, mme o buile ka pulamadiboho e tla hlaha. Re utlwile tsa hae, mona tlase mono ho—mono Jordane, 'Ke tla roma lengosa la Ka pela sefahleho sa Ka, ho hleka tsela.' Ke utlwetse ka yona. Mme re lebeletse Messia ho fihla, hang."

Ho re, "Ke Nna ya ntseng a buisana le wena."

¹⁷⁰ Yaba ke phetho. A kena motseng, a re, "Tloong, le bone Monna Ya mpoleletseng tseo ke di entseng. Na enwa ha se Messia na?"

¹⁷¹ Metswalle ya ka, ha re na nako ho tswela pele. Empa haeba e ne e le Messia maobane, ke Messia kajeno, hoba esale Yena maobane, kajeno. O shwetse ho etsa pheko, ho etsahatsa dintho tsena, ho le nea menyetla ya ho hula ho seo A le etseditseng sona. Jwale, hopolang, haeba o le moetsadibe, ka tshwanelo o bolokehile mohla Jesu a shwang Sefapanong, empa o tlameha ho e dumela le ho e amohela e le ya hao, e le poloko

ya hao ka sebele. Mme haeba o kula, o ne o fodiswe mohla Jesu a tetekwang ka baka la ditlolo tsa rona. O ne o fodiswe ka maqeba a Hae.

¹⁷² Jwale hola A eme mona bosiung bona, a apere sutu ena A mphileng yona, ho ke ke ha ba le... Holane o ka re, "Mphodise, Morena," O na ke ke a etsa hoo. O se a e entse. Wa bona?

¹⁷³ Empa jwale ha e mong wa lona a ka re, "Na Jesu a ka ba Birmingham, ha ho le jwalo, bosiung bona?" E, monghadi. O tshepisitse A tla etsa hoo. "A ka ba mona jwang, ka sebopetho sa eng?" Moya o Halalelang, ke seo A leng sona, yena maobane, kajeno, le ka ho sa feleng. O sebopethong sa Moya o Halalelang.

¹⁷⁴ Jwale eka nkabe ke ena le nako ya ho kenya mohopolo o mong mona, empa mohlomong nke ke ka kgona. E reng, e reng ke e tshware, ka potlako. Na le ka kgona, le ka mmamella metsotso e mmalwa? [Phutheho e re, "Amen."—Mong.] Ha ke batle ho le tshwarella, la be la fosa dibese tsa lona.

¹⁷⁵ Jesu o boletse, ho Mohalaledi Luka kgaolo ya 16, kapa kgaolo ya 17, "Jwaloka matsatsing a Lota, ho tla ba jwalo ho tleng ha Mora motho." Na O itsalo? [Phutheho e re, "Amen."—Mong.]

¹⁷⁶ Jwale shebang na e ne e le eng. O na a bala yona Bibele eo re e badileng, Genese 22 kapa 19, 20, hantle kae mono kae. Lemohang, O na a bala yona Bibele e tshwanang. Shebang madulo a Lota. Oh, e ne e le setjhaba se tletseng sebe hakakang, sebaka sa sebe se se kakang! Bonang moo re leng teng kajeno.

¹⁷⁷ Shebang seo A se buileng, "E—e—e—e moloko wa sebe le o mofebi; o kgopo, o mofebi o batla pontsho. Mme ba tla e fuwa, pontsho ya Jonase a tsohileng bafung; kapa a tsoha e se e le ya itjhweletseng, mpeng ya leruarua matsatsi a mararo le masiu. Mora motho, pontsho ya tsoho, moloko o mofebi ona o tla fuwa pontsho ya tsoho."

¹⁷⁸ Jwale Jesu o boletse, "Jwaloka matsatsing a Lota." Lemohang madulo ao. Ho hlahile Mangeloi a mabedi tlase mono hara Masodoma, a rerang, barongwa ba babedi ba baholo. E Mong a sala le Abrahama.

¹⁷⁹ Mme bao ba theohileng le Sodoma tlase mono, ba entse dipontsho. Empa ba etsang? Ho rera Evangeli le ho ba otla ka bofofu. Thero ya bona ka sebele e fofadise batho. Haeba e ne e se Billy Graham wa mehla ena, ha ke eso bone e mong. Ha ho eso hlahe moromuwa le jwale, mengwaheng yohle, eo lebitso la hae le kileng la fell a -h-a-m, ho kereke. Hopolang, re bile—bile le Moody, Sankey, Finney, Knox, Calvin, le ba jwalo, Billy Sunday, empa e seng -h-a-m ho fihlela nakong ena; -h-a-m, "ntata ditjhaba." E teng jwale, wa bona, tlase mono. Shebang madulo a Sodoma.

¹⁸⁰ Mme, le hopole, Monna e mong a sala le bona hodimo mono, eo Abrahama a mmitsitseng *Elohim*, Modimo. Shebang seo yena, a tseba jwang E ne e le Elohim. O itse, “Abrahama, Sara mohatsa’o, o kae?”

Ho re, “O ka tenteng, ka mora Hao.”

¹⁸¹ Dilemong tse lekgolo. Ho re, “Ke tla o etela, ho latela tshepiso eo Ke o neileng yona, ka nako ya bophelo,” matsatsi a mang a mashome a mabedi a metso e robedi. Esale o lebeletse dilemo tsena tsohle tse mashome a mabedi a metso e mehlano, jwale. Sara o mashome a robong yena o lekgolo. “Ke tlilo o etela ho ya ka nako ya bophelo.”

¹⁸² Mme Sara a ya, “huh,” a inahana, ka tenteng.

¹⁸³ A re, “Sara o tshehile ken’g, ‘huh,’ eo, ka tenteng, ka mora Ka?”

¹⁸⁴ Abrahama o Mo bitsitse, “Elohim,” Modimo o bonahetseng nameng ya motho. A e ja e—e namane, a nwa lebese la kgomo, mme a ja bohobe, dinkgwa tsa koro; mme e le Modimo o bonahetseng nameng.

¹⁸⁵ Jesu o boletse, “Jwaloka matsatsing a Sodoma, ho tla ba jwalo ho tleng ha Mora motho,” mohla Modimo a tla boela a Ipontsha ka nama ya motho.

¹⁸⁶ Mme, le hopole, eo e ne e le pontsho ya ho qetela. Abrahama o kile a bona pontsho ka mora pontsho ka mora pontsho. Empa Modimo e ne e le enwa, nakong ena, a bonahetse nameng, mme a kgona ho bolela seo Sara a se hopotseng, ka mora Hae. Hoo ho tsebilwe e le Lentswe, hobane Lentswe le senola mehopolo e ka pelong. Wa bona? Le a e tshwara? Phahamisang matsoho a lona ha le kgona. [Phutheho e re, “Amen.”—Mong.] Ho lokile. Wa bona? Jwale, eo e ne e le pontsho ya ho qetela.

¹⁸⁷ Jwale, hopolang, Abrahama le sehlopha sa hae ba na ba se ka hara Sodoma. Ba na ba le ka ntle ho Sodoma, ba se ka ntle koo lefatsheng la bodumedi; ka ntle ho mono, ka ntle koo. Le bona pontsho ba e fumaneng, melietsa e meholo ya hlalefo? Empa shebang na Kereke ya mokgethwa e fumane pontsho efe, Abrahama. G-r-a-h-a-m ke dihlaku tse tsheletseng, lefatshe, palo ya motho. Motho o hlodilwe ka letsatsi la botshelela; ke tshelela. Empa A-b-r-a-h-a-m ke dihlaku tse supileng, wa bona, Kereke e kgethilweng e emeng ka ntle? Lemohang, ba fumane pontsho eo, Modimo o bonahetseng nameng.

¹⁸⁸ Mme Jesu o boletse, jwale shebang, Luka kgaolo ya 17, mono ho... “Ho tla ba jwalo, jwaloka matsatsing a Sodoma, ho tla ba jwalo ho tleng ha Mora motho, mohla Mora motho a tla senolwa.” Mme, le hopole, mohla Mora motho, matsatsing ana a qetelo, a bonahatswang bathong ba Hae, ka ho sebetsa hara batho ka Boyena. Johanne, jwaloka ho etsahetse ho 14:12, e boletse, “Mesebetsi eo Ke e etsang le tla e etsa le lona.”

¹⁸⁹ Mme re tshepisitswe hoo, ho kgutlisetsa. Puo e nngwe le e nngwe e salwa morao ke molaetsa. Mme Molaetsa e ne e le ona, “Ho kgutlisetsa tumelo morao Tumelong ya tshimoloho.” Malakia 4, “Ho kgutlisetsa Tumelo ho . . . ya bontate, ho batho.” Ba kgelohetse dinthong tse ngata tsa mefuta yohle, empa, “Ho kgutlisetsa, hape, Tumelo eo.” Molaetsa wa hora, ke ona, “Ho kgutlisetsa Lentswe!” Modimo, e leng . . .

¹⁹⁰ Hopolang, re lebeletse Mora wa tshepiso. Mme rona re Peo ya Abrahama. Na ho jwalo? [Phutheho e re, “Amen.”—Mong.] Peo ya Borena, ka Kreste! Mme ba na ba lebeletse mora wa tshepiso, Isaaka. Mme Peo ya borena, kajeno, re shebeletse pontsho ya tshepiso. Na ho jwalo? [“Amen.”] Mora Modimo wa tshepiso, ho kgutla. Mme e leng . . .

¹⁹¹ Ba fumane melaetsa ya mefuta yohle, mme Abrahama o bone dintho tsa mefuta yohle. Empa pele mora wa tshepiso a fihla, pontsho ya ho qetela pele lefatshe la Baditjhaba le timetswa, e ne e le ena: Modimo o bonahetseng nameng, o tsebileng merero ya pelo.

¹⁹² Jwale eo ke pontsho ya ho qetela eo kereke le Kereke ya moyo e fumanang. Ke pontsho ya ho qetela e fumanwang ke kereke ya tlhaho. Mme lefatshe la Baditjhaba le tla timetswa, mme hona jwale le mothating oo.

¹⁹³ Lefatshe le sisinyeha ka hohle, ke dithothomelo. Hobaneng? Kgetlo la pele thothomelo ya lefatshe e sisinya lefatshe lohle, e ne e le mohla Labohlano le Molemo. Kgetlo la ho qetela le sisingwa, e ne e le Labohlano le leng le Molemo. La sisingwa ka morero ofe? Hoba ba na ba latotse Messiah wa bona. Ebe hobaneng le boetse le sisintswe? Ba boetse ba entse ntho eo. Wa bona?

¹⁹⁴ Mongwaha Kereke ya Laodisea. Moithuti mang wa tseba O na a le ka ntle, a kokota, ho leka . . . “Bonang, Ke eme monyako kea kokota.” [Moena Branham o kokota ha hlano sefaleng—Mong.] Ona feela mongwaha kereke o kileng wa Mo ntshetsa ntle ka botlalo. Mme Lekgotla la Dikereke, ke hantle feela seo le se entseng, ho bopa letshwao la sebata, le ho kenya ka hare ka mono. Be, ebe ke . . . Ba babedi ba ka tsamaya mmoho athe ha ba dumellane? Mme ka ho etsa jwalo, ba boetse ba latotse Lentswe; Le ka ntle. Le tshebedisano-mmoho, ha e yo sebakeng sefe. Ke hantle haholo.

¹⁹⁵ Oho Modimo, ako hauhele! “Jesu Kreste yena maobane, kajeno, le ka ho sa feleng.”

Ha re inamiseng dihloooho tsa rona.

¹⁹⁶ Morena Modimo, O itsebisa ka Bowena, mengwaheng yohle, Modimo. O no o le Modimo Ya buileng mehleng ya kgale le bontate ka baporofeta, matsatsing ana a qetelo ka Mora wa Hao, Jesu Kreste; Eo re mo ratang re mo dumelang, mme re Mo tseba e le yena maobane, kajeno, le ka ho sa feleng, etswe A tshepisitse.

¹⁹⁷ Jwale, Ntate, sehlopha se kgabane hakana, tumelo e babatsehang. Ho bonolo ho bua le bona. Empa, oho Morena, tumelo eo e ke e nyolohe jwale, ho kena sedikeng se seng jwale, ho tswela ka ntle ho mohopolo wa motho. Ba utlwile sena. Ba e rutilwe ke badisa ba bona. Bona, esale ba e shebeletse, dilemo le dilemo, ho fihla. Mme jwale rea rapela, Ntate, O tle o re tsebise yona, bosiung bona, hore ha O a shwa, empa O phela ka mehla le mehla; le ho phela hara batho ba Hao, jwaloka Mohaladitwe phuleng, hara dipalesa tse ding tsohle, palesa e leng thatohatse hara tse dikete di leshome.

¹⁹⁸ Jwale rea rapela, oho Mohaladitwe wa Phula, O tle ho rona, bosiung bona. Ako Itsebise hara rona, ho Itsebahatsa mongwaheng ona. Hoba e tshepisitswe, ke tswa ba bolella feela Lentswe, hore matsatsing a qetelo, jwaloka Sodoma le Gomora, le Mora motho o tla Itshenola jwaloka ha A entse Sodoma le Gomora; pele Mora wa tshepiso a tlela mokgethwa, le tshenyeho e tlela ba latotsweng. Ka hona kea rapela, Ntate, ba tle ba utlwisise sena. Mme O tle o boloke Lentswe la Hao, etswe ke tseba O tla etsa hoo. Ka Lebitso la Jesu. Amen.

¹⁹⁹ Jwale, ke kgolwa Billy a itse ho abile ditlankana tse ding. Na ho jwalo? Phahamisang matsoho a lona haeba ditlankana di abilwe. Tlhaku e hodima tsona ke efe? [Motho o re, "B."—Mong.] B. Ho lokile, B. Ka potlako jwale a re...

²⁰⁰ Ke tlilo le kopa ntho e le nngwe, ha le ka dula le sa sisinyehe jwale. Le se ke la phethesela. Re feng metsotso e leshome feela. Na le tla etsa hoo? Metsotso e leshome feela, ha motho mang le mang oa ka itulela a thotse ka ho phethahala metsotso e leshome. Le se ke la phethesela. Ho lokile.

²⁰¹ Ha re qaleng ho palo ya nngwe. Ke mang ya tshwereng B, palo ya nngwe? Hantle ka potlako jwale, phahamisa letsoho la hao. Ha o sa kgone...

²⁰² Monna a na tsamaya ka moalo, shebang na palo ya setlankana sa hae sa thapelo ke efe, haeba e le yona. Wa bona, o na le setlankana sa thapelo na? Wena, ha o na sona? Ho lokile. [Motho o re, "Ke nne."—Mong.] Ho lokile.

²⁰³ Palo ya nngwe, na ke e fositse? [Motho o re, "Mona."—Mong.] Kapa mohlomong re ka qala nqa e nngwe, ke hona. Ho lokile. [Motho o re, "Hantle mona."] Oh, ke maswabi. Ho lokile. Palo ya nngwe, palo ya pedi, tharo. Palo ya pedi, ema, hoba... Ema ka maoto ka nako, wena, ha ke bitsa palo ya hao. Pedi, nngwe, pedi, tharo, nne. [Motho o re, "Hantle mona."] Nne.

²⁰⁴ Hlano. Sheba setlankana sa hao jwale. Hlano. Tloong kwano hantle le qale molanyana. Hlano. Tshelela, tshelela. Supa, supa. Ha o sa kgone ho ema jwale, motho a phahamise letsoho la hao, re tla ba emisa. Ho lokile, supa. Robedi, robedi, robedi. Supa, robedi. Jwale feela re... Jwale re hlile re se re tlole nako.

²⁰⁵ Ho lokile, hoo ho lokile, e reng a dule mono ho fihlela re loketse ho mmitsa, mme le tla mo kenya moo a lokelang moleng. Ho lokile.

²⁰⁶ Robong, robong. Leshome, leshome. Leshome nngwe, leshome nngwe, leshome nngwe. Emisang mono, ke hona. Ho lokile.

²⁰⁷ Jwale bongata mona ha bo na setlankana sa thapelo, mme le a kula? Phahamisang matsoho a lona. Be, phahamisang matsoho a lona. Ba ba kae ka mona ba sa ntsebeng, phahamisa letsoho la hao; ya tsebang ke sa tsebe letho ka wena, phahamisa letsoho la hao. Ho lokile. Jwale sheba ka mona mme o dumele jwale. Ke... Motho mang le mang ka hlompho ya ruri.

²⁰⁸ Jwale le hopole feela, polelo e tswang ho Yena e tla ba bohlokwa ho feta sohle seo nka se buang dilemong tse lekgolo. Wa bona, nka rera Hona. Ba ba kae ba dumelang *Hoo* e le Nnete? [Phutheho e re, “Amen.”—Mong.] Ho lokile. Jwale, haeba E le Nnete, Modimo o tlamehile. Haeba e le Lentswe la Hae, e le tshepiso ya Hae, O tlamehile ho e phetha. O tlamehile ho thasisela Lentswe la Hae. Na ho jwalo? [“Amen.”] Mme haeba A fela a e etsa, le tla e dumela na? [“Amen.”] Le a e dumela.

²⁰⁹ Jwale o ka re, “Jesu? Ha ke qamake mme ka Mo bona kae-kae.”

²¹⁰ Shebang, hola motho a ka kena mona a le mehwabadi ya dithakgisa matsohong a hae, le—le ntho sefahlehong sa hae, le madi, le tse jwalo? Moikaketsi ofe a ka etsa hoo. Mme, le hopole, Jesu a ke ke a tla jwalo. Mohla A tlang jwalo, nako ha e sa tla ba teng. Nako e tla be e fedile, mohla A tlang jwalo.

²¹¹ Empa hobaneng o tla tseba hoba ke Yena haeba A tla? Hobane O tla Itsebisa ka wa Hae—Moya wa Hae, pontsho ya Hae, Bophelo ba Hae ka ho wena. “Ke Nna sefate sa Morara, lona le makala.” Jwale le hopole mme le dumele hoo ka pelo yohle ya lona jwale.

²¹² Jwale, ke wona mola wa lona wa thapelo, bohole ba kene mono? Ha ke—ke tsebe, ba robedi kapa ba leshome. Ho lokile, hoo ho itoketse. Tloo kwano. Hosane bosiu re tla leka ho qotsa ho feta. Mang le mang ka tshabo ya ruri. Jwale ba tliseng, ka bonngwe ka bonngwe, ha ba e tla.

²¹³ Jwale, tabeng ya pele, ke batla bohole ba moleng oo wa thapelo, ba tsebang ke sa le tsebe, molana wa thapelo mona, ba tsebang ke sa ba tsebe, phahamisang matsoho a lona; ba tsebang ke sa tsebe letho ka bona, ke sa tsebe letho, ha ke tsebe se phoso ka wena, ha ke na le mohopolo. Ho lokile.

²¹⁴ Jwale, ka tshabo e rurti, jwale hopolang moo re emeng teng. Lentswe le badilwe.

²¹⁵ Jwale, hopolang, nke ke ka fodisa motho; ha ho motho ya ka fodisang e mong. Empa tumelo ya hao, ho eo e leng Kreste, ke yona e fodisang. Jwale haeba A tla Itsebahatsa mona se ka A entse, ho Itsebisa tjena se ka A entse matsatsing a mang, na le tla Mo tseba ka hoo? [Phutheho e re, “Amen.”—Mong.] O boletse A tla Itsebisa ka tsela eo. Ke yona feela tsela A kileng a Itsebisa ka yona. Mme ke Yena maobane, kajeno, le ka ho sa feleng.

²¹⁶ Jwale mosadi ke enwa, jwalo feela ka ho Mohalaledi Johanne 4. Jesu o kopane le mosadi sedibeng; ke buile ka yena metsotso e mmalwa e fetileng. Monna le mosadi ke bana. Ha ke eso bone mosadi. O sa tswa phahamisa letsoho la hae, a re, ha ke eso mmone mme le yena ha eso mpone, ka hona ha re tsebane ka botlalo. O mpa a fumane setlankana sa thapelo, mme palo ya hae e mpile ya bitswa. Na o . . .

²¹⁷ [Kgaitsedi o re, “Tjhe, o ne o nthapelle Hammond, Indiana. Ke ne ke bua, ke re, ha o tsebe letho ka bophelo ba ka, leha ho le jwalo.”—Mong.]

²¹⁸ O re, kwana Hammond, Indiana nkile ka mo rapella, empa, o itse, ha e le bophelo ba hae, ha ke tsebe letho ka yena, ha ke tsebe letho. Ha ke tsebe lebaka la hao mona, kapa letho. Ehlide, batho ba makgolo meleng ya thapelo, nka beng ke ba bone dikopanong, le jwalo, ka tsela eo. Empa ha ke bua, ke re, kea tseba ha ke . . . Modimo Lehodimong o a tseba, Bibele ena e hodima pelo ya ka, nke ke ka hopola seo, motho ya hole ha kaalo, motho ya rapeletsweng dilemo tse fetileng mohlomong. Hammond, Indiana, ke kgale haholo, dilemo tse ngata kgale ha ke le Hammond, Indiana, dilemo tse robedi kapa tse leshome tse fetileng. Ka hona jwale feela . . .

²¹⁹ Jwale ha Morena Jesu a ka ntshenolela lebaka la hao ho ba mona jwale, hoo ho tla nepahatsa Mohalaledi Johanne 4 hantle. Sohle se neng se dutse pelong ya hao, Lentswe le senola mohopolo wa pelo, jwaleka Jesu ha a entse ho mosadi sedibeng. O ka e dumela e le nnete ke hona? [Kgaitsedi o re, “E.”—Mong.] O tla etsa hoo?

²²⁰ Na mokgupi o tla e dumela e le nnete? [Phutheho e re, “Amen.”—Mong.]

²²¹ Jwale letsoho la ka ke lena hodima Bibele, le re ha ke hopole mosadi, nke ke ka ba le mohopolo. Mme o ile a phahamisa letsoho la hae, le yena, nke ke ka tseba lebaka la ho ba ha hae mona. O boletse a mpone Hammond, Indiana, e ka ba . . . Lona—lona, e mong le e mong, mohlomong o no o le teng, ka moo ke tsebang. Nke ke ka tseba, haese kopanong feela.

²²² Empa jwale Morena Jesu a ke a abe sena, haeba A ratile. Ha ke re O tla etsa hoo.

²²³ Jwale ke bea moyo o mong le o mong mona, tlasa bolaodi ba ka, ka Lebitso la Jesu Kreste. Jwale e bang le tshabo ya ruri.

²²⁴ Ha o se modumedi, ha ke o eletse ho dula ka mohahong, hobane malwetse a tswa ho e mong a ya ho e mong. Re tseba hoo. Le mahloko a etsa hoo. Ba bangata ba kileng ba etela dikopano ba e bone e etsahala.

²²⁵ Jwale ke batla ho buisana le wena jwaloka Morena wa rona a entse ho mosadi eo. Jwale, wa bona, oeme mono, o a hloka. Mme, wena, mohlomong o Mokreste. Ha ke tsebe o yena na. O tla mpolella ha o le yena. Mme, hape, nna ke Mokreste. Jwale re babedi, mmoho, monna le mosadi. Mme, hape, Moya wa Modimo o teng mona ka neo, ho o tsebisa seo o buang le Yena ka sona, seo o se buang. E ka ba ditjhelete. E ka ba lelapa. Ha ke na le mohopol. Empa e ka bang eng, o tla tseba haeba e le nnete, kapa tjhe, haeba A e senola.

²²⁶ Ke lethopa. Ha e nepahetse, phahamisa letsoho la hao. Jwale o a dumela na? Jwale sheba. O batla ke o bolelle moo lethopa le leng teng? Le mmetsong wa hao. [Kgaitsedi o re, “E.”—Mong.] Ha e nepahetse, tsokotsa letsoho la hao *tjena*. Jwale o a dumela na? [“E, monghadi.”] Ho lokile. Ikele ka tsela ya hao, o ntse o boka Morena, hore o—o dumela hoo.

²²⁷ Tloo. Nna le wena ha re tsebane, kea kgolwa, mofumahadi. [Kgaitsedi o re, “E.”—Mong.] Ha re tsebane, empa Modimo o re tseba bobedi ba rona. O a dumela Modimo a ka ntshenolela bothata ba hao? Na hoo ho tla o thusa? [“E.”] Ho etsa hore o dumele?

Ebang le tshabo ya ruri, e tiileng ruri.

²²⁸ Jwale, hopola, ho kile ha ba le mosadi ya se nang setlankana sa thapelo, re ka rialo. O ile a feta hara e... a ama moleka wa seaparo sa Hae. Mme hoba a etse hoo, Jesu a retoloha mme a re, “Ke mang ya Nkamileng?” Na ho jwalo? [Phutheho e re, “Amen.”—Mong.]

²²⁹ A ena le phallo ya madi. A re, ka ho yena, “Ha nka ama Monna eo, ke tla fola.” Mme yaba o a Mo ama. Mme a...

A re, “Ke mang ya Nkamileng?”

²³⁰ Mme, kgele, esita le Petrose a Mo kgalema, a re, “E ka utlwahala eka O na le bothata kelellong kapa ho hong.” Ho re, “Kgidi! Kgele, motho e mong le e mong o ntse a O ama.”

²³¹ A re, “Ee, empa Ke ile ka fokola. Ke lemo hoba molemo o tswile ho Nna.” Yaba O retoloha a qamaka mme a sheba hodima letshwele A ba a fumana mosadi eo. Mme A mmolella seo phallo ya hae ya madi e ne e le sona, a re e fodile. Le sa hopola hoo? [Phutheho e re, “Amen.”—Mong.]

²³² Jwale Bibele e boletse, “Kajeno,” a bareri ba re arabele sena, “hona jwale Ke Moprista e Moholo ya ka angwang ke maikutlo a mahlomola a rona.” Hoo ho jwalo na? [Bareri le phutheho ba re, “Amen.”—Mong.]

²³³ Ako inkele ho Yena feela. Ho re, “Morena Modimo, mmoledi eo ha a ntsebe. Mme nna o ntumelle ho ama seaparo sa Hao. Na O ka bua ka yena?” Ha E le yena maobane le ka mehla, O tla itshwara ka ho tshwana. Hona jwale O nameng ya motho, o a sebetsa, o ntse a lopolla batho ba Hae.

²³⁴ Jwale aka rapele feela jwale, dumela ka pelo yohle ya hao. O se belaele. O se belaele le letho. Dumela dintho tsohle. Ako dumele ka sohle se leng ka ho wena. Dumela.

²³⁵ Jwale ke batla feela—feela ho hokana le moyo wa hao, mofumahadi, ho qoqa le wena feela. O a dumela dintho tsena di nepile? O dumela Morena Jesu a ka ntshenolela morero wa hao ho ba mona? Le wena o na le lethopa. Ke mnete. O a dumela A ka ntshenolela moo le leng teng? Le dipudulaneng tsa bosadi. [Kgaitsemi o re, “E.”—Mong.] Le hore pudulana eo ke efe, le ka hara polelo. Ke mnete. [“E.”] Ho lokile. Dumela jwale, ikele, e ba le tumelo ka pelo yohle ya hao.

²³⁶ Jwale monna ke enwa. Monna o kile a tla ho Morena Jesu, mme lebitso la hae e le Simone, jwale, mme a rewako Petrose; Jesu a mmolella na ke mang le moo a tswang teng, kapa se mabapi le yona. Jwale ha Morena Jesu a ka ntshenolela lebaka la hao mona, na o tla dumela hoo? O a tseba e tla lokela ho ba nnete, haeba—haeba o tseba e le nnete kapa tjhe. Empa, wena, o a dumela hobane ke mohlanka wa Hae. [Moena o re, “Ke hantle. Ke a e tseba.”—Mong.] O a tseba. Kea leboha, monghadi. Kea leboha. Morena a o thuse jwale ho dumela hoo ka pelo yohle ya hao.

²³⁷ Ke nthwana ena mona, ke ne ke leka ho e hara hantle. [Moena Branham o lokisa maekrofono—Mong.]

²³⁸ Jwale ha o boela o sheba ka mona. E, monghadi. O tlameha ho tjamelana le karo ya ho taboha ha mofuta. Ke hantle. Hape, hernia, o tshwerwe ke hernia. O a dumela nka o bolella na o mang? O a e dumela na? O moruti, o a—o moreri, hoba ke o bona sefaleng. Mme lebitso la hao ke Wallace. [Moena o re, “Uh-huh.”—Mong.] Dumela ka pelo yohle ya hao. [“Glory!” Phutheho e opa diatla.] Modimo a o hlohonolofatse. [“Mono ke dilemo tse mashome a mabedi tse fetileng, kwana Pensacola.”] Be, kgidi, kgidi! Ke hantle. Eba le tumelo jwale. O se belaele. Eba le tumelo feela. Dumela jwale.

²³⁹ Jwale rona ha re tsebane. Modimo o re tseba bobedi ba rona. O a dumela Morena Modimo a ka mpolella letho ka wena, morero wa hao mona, kapa ntho e nngwe? Ke batla ke potlaka, hobane batho ba—ba hatellana, o a tseba. Ke... O a dumela A ka ntshenolela letho le phoso ka wena? [Kgaitsemi o re, “E, monghadi.”—Mong.] O etsa jwalo. Mme o a tseba maikutlo a sa tswa o kgurumetsa, lekgatheng leo, a na ke ke a tswa ho nna. Ke Yena. [“E.”] A o utlwisa, a o etsa mosa, a o kokobetsa. [“Ke hantle.”] Mme, Hono, na o kile wa bona senepe sa Lesedi leo? [“E.”] Kgele, Ke yona ntho e o teetseng hare hona jwale.

²⁴⁰ Jwale mofumahadi o ntse a sutha ho nna. O a kgathatseha. Kea mmona, eka o a holofala. Mme o na le athritisi, e tla... [Kgaitsedo re, "E."] Ke hantle. Haeba e le nnete, phahamisa letsoho la hao. ["E."] Ke hantle. O bile o na le bothata ba thyroid. ["Ke hantle."] O jewa ke bothata ba thyroid. ["Ke nnete."] Ke nnete. Mme hape o na le mathata a pelo, ke mathata a tswang pelong ya hao. ["E."] Le hoo, ke nnete. ["Ke nnete."] Ha o tswe mona. O tswa naheng ya mofuta moo ho nang le ntho e ngata ya... O tswa hole haholo. O tswa Pennsylvania. ["E, monghadi, ke jwalo."] Ke hantle, theohela kwano. Jwale ikele hae o fole. Jesu Kreste o a o fodisa, o a o phedisa.

Tloo. Eba le tumelo jwale. O se belaele.

²⁴¹ Jwale le se leke, le se ke la sisinyeha, ka kopo hleng. Nakwana e seng kae feela jwale, re tla...ha le ka mpha e mong. Mpheng bothata bo bong bona mme re tla kgaotsa, ha le ntumella feela ho tshwarana le bothata bona. Le se ke la sisinyeha, ka kopo le se etse hoo. Kea tseba ke le tshwarella nako e telele. Empa, wa bona, wena o moyo, mme hona jwale ke hokane le e mong le e mong wa lona. Wa bona? Jwale e bang le tumelo.

²⁴² Ke—ke osele ho wena. Ha ke o tsebe. Kreste o a o tseba.

²⁴³ Monna o teng ya dulang a e tla. Oh, ke ntho ena, e—e monna ya hloho-putswa a dutseng mona, o kgathatswa ke bothata mangoleng a hae. O a dumela Modimo o tla phekola, monghadi, mme a o fodise, ka bothata boo ba lengole? Mme o a dumela O tla o phekola? Monna hantle ka morao ho—ho setulo sa mokudi mono, ha o ka dumela ka sohle... O jewa ke lengole. Phahamisa letsoho la hao. Ke hantle. O amile ho Hong, ha o a etsa jwalo? O amile Yena. Uh-huh. Ke hantle.

²⁴⁴ Ebile, le hona, mofumahadi ya dutseng pela hao, lesedi... mosadi. O dumela ho nna, kgaitsedo, ba tle ba tsebe hobane e tswa ho Modimo? O a dumela ke moporofeta wa Hae? O dumela ho nna?

²⁴⁵ Modumo o phethohang oo. [Morero o hodisang mantswe o hlhisa modumo o neeletsanang—Mong.]

²⁴⁶ O kgathatswa ke kgatello ya madi. Ha e le yona, phahamisa letsoho la hao. Ke hantle, bea letsoho la hao hodima hae, le yena, hoba ha a e fumana hantle. Mme le dumele ka pelo yohle ya lona, mme bobedi ba lona le tla phekola.

Ba amile eng?

²⁴⁷ Mona, mofumahadi e mong o sa tswa tshwara hoo. O dutse hantle morao mona, o inamisitse hloho ya hae, o a rapela. O rapela Morena ho mo fodisa. Seo a... O a tshwenyeha, o dutse hantle ntlheng ya mola mono. O ntse a rapella mpa e kgaohileng methapo. Mme o a dumela Modimo o tla o fodisa,

mofumahadi? Phahamisa letsoho la hao. Mosajana, ya hlohotshwana a rwetse digalase, a na ntsa rapella Modimo ho mo fodisa. Ha ke mo tsebe, ha ke eso mmone bophelong ba ka. Modimo o tseba hoo. Haeba ke le osele ho wena, tsokotsa letsoho la hao, mofumahadi. Ke hantle, ha ke tsebe letho ka wena. Be, jwale, o a tseba hoo ke nnete, ha ho jwalo? Ho lokile, Jesu Kreste o a o fodisa, ha o ka e dumela.

²⁴⁸ Ebile, ya dutseng ka mora hae, mofumahadi ya dutseng mono, ya dutseng hantle ka mora hae mono, o ntse a rapela, le yena. Ke ho sala Lesedi leo morao feela. E. Na ha le bone Lesedi leo le lopaletseng mono? Wa bona? Wa bona? Jwale shebang. Mosadi o tswa sehwa, empa seo a hlileng a batla Kreste a mo etsese sona ke ho tlosa mathopa sephakeng sa hae. O a dumela jwale O tla e etsa? Pha-...E, phahamisa letsoho la hao. Ke hantle. Haeba o e dumela, o ka e fumana. Eba le tumelo feela, mme o se belaele. Dumela. Ke...

²⁴⁹ Tjhe, ka banna ba babedi ba fapaneng. Ke ne ke nahanne, monna enwa; ke monna *enwa* ya dutseng mona. O a dumela, monghadi, o dutseng hantle *mona*? O dumela ka pelo yohle ya hao? O a dumela Modimo o tla o fodisa bothata boo ba prostrate, a o phekole? O jewa ke bothata ba prostrate. Tsokotsa letsoho la hao, ha e nepahetse. Ke hantle. Tumelo ya hao e a o phekola, monghadi. Jesu Kreste o fodisitse. Ha ke eso bone monna eo bophelong ba ka.

²⁵⁰ Na ha le bone O teng mona? Ha le Mo dumele na? [Phutheho e re, “Amen.”—Mong.] Na ha le bone ke Yena eo?

²⁵¹ Jwale motsotso feela. Yona...Oh, ee. Ha ke kgolwe A o boleletse letho ka wena, na O entse jwalo? O a dumela A ka etsa hoo? O a dumela nka e etsa, ka mohau wa Hae le matla? Na e tla be e le tshepiso ya Hae? O jewa ke bothata bo amanang le molala wa hao. O kile wa wa, mme ke sona sesosa. Ke hantle. Kgutlela morao jwale, o tla phekola. Jesu Kreste o a o phekola.

²⁵² Le a dumela, motho ka mong o dumela ka pelo ya hae yohle? [Phutheho e re, “Amen.”—Mong.] Jwale ho na le badumedi ba ba kae mona? Phahamisa letsoho la hao. Hohle ka moahong, hodimo. Ke hantle, le dumele. Jwale ka potlako.... Rona ruri, re batla re tlotse ka bohare ba hora. Le etse sena hona jwale. Jesu o boletse...

²⁵³ Lea dumela esale Yena maobane, kajeno, le ka mehla? Lea dumela O tshepisitse ho etsa sena letsatsing lena? Lea dumela ke pontsho ya ho qetela eo kereke ena e tla e bona jwale pele ho kgutla ha Morena ho bonahala? Lea dumela re pheletsong hantle, Mangolo wohle a phethilwe, re mothating wā ho tla ha Mora?

²⁵⁴ Jwale Jesu o boletse, “Mehlolo e tla tsamaya le ba dumelang ke yona ena.” Jwale ako bee letsoho la hao hodima

motho ya haufi le wena. Jwale, o modumedi. "Mehlolo e tla tsamaya le ba dumelang ke yona ena." Jwale haeba A boloka Lentswe la Hae, ho etsa sena, O tla boloka Lentswe la Hae ho etsa hoo, hape. Jwale rapella motho ya haufi le wena. Le bona ba o rapella. Wa bona? Jwale o se ke wa ithapella. O rapelle motho eo; ba ntse ba o rapella.

Jwale ha re inamiseng dihloho tsa rona re sa rapela.

²⁵⁵ Ntate wa Lehodimo, re motlotlo ho bona Messia ya tsohileng. Dilemo tse makgolo a leshome le metso e robong tsa mefuta yohle ya thutamodimo le metsamao, empa le jwale, hara lefifi lohle la yona, O tshepisitse hoba O tla hlaha mona matsatsing a qetelo, letsatsing lena la Sodoma, mme O tla Itsebisa bana ba Abrahama, ba bitsitsweng, bakgethwa. Mme ke Wena enwa, bosiung bona ka mora dilemo tse makgolo a leshome le metso e robong, O sa phela bosiung mokana O entse mohla O buang le mosadi sedibeng. Ke Modimo o bonahetseng nameng, jwale nameng ya Monyaduwa wa Hae, hoba Monyaduwa le Monna ke nama e le nngwe e tshwanang. "Ba babedi bana ba bang." Mme Kereke e fetoha Monyaduwa, ka dinako tsohle, ka ho dumela Lentswe, ka baka leo Lentswe le Kereke di fetoha ntho e le nngwe. Lentswe le ka hara Kereke, hoo ho etsa Monyaduwa. Pontsho ya ho qetela, Modimo o a Itsebahatsa, Lentswe ka hara Kereke.

²⁵⁶ Oho Modimo, batho bana ba reng ba dumela, ba beane matsoho hodimo. Ba ntse ba rapela. Sheba fatshe ho tswa Kganyeng ya Hao, Morena, tadima. Thasisetsa Lentswe la Hao. O boletse, "Mehlolo e tla tsamaya le ba dumelang ke yona ena. Ha ba bea matsoho hodima ba kulang, ba tla fola."

²⁵⁷ Oho Modimo, Satane a fuparolle phuparo ya hae tumelong ya bona bosiung bona. Modimo a kene a ba tsebise hoba O Itsebahaditse hantle mona hara rona. Mme Jesu Kreste Mora Modimo o na le rona hona jwale, Jesu Kreste ya tsebahaditsweng ya tsohileng, o ntse a Itsebisa. Kgetlo la pele A etsa sena esale dilemong tse makgolo a leshome le metso e robong tse fetileng, mme O mona bosiung bona. Satane a ke a lahlehelwe ke matla a hae; ho se dumele ha hae ho nyamele, mme matla a Kreste ya tsohileng a kene bathong bana a fodise e mong le e mong wa bona. Mme re leleka Satane. Ka Lebitso la Jesu Kreste, a tlohe bathong bana hona jwale, bohle ba tle ba phekolve; ba sa rapela, e mong hodima e mong, ba beane matsoho a bona. Aba sena, ka Lebitso la Jesu Kreste.

²⁵⁸ Jwale le nne le beane matsoho hodimo. Dumelang jwale. Dulang le inamisitse dihloho tsa lona, mahlo a lona a kwetswe. Le dumele. Ha ke tsotelle moo o leng teng, phoso ya hao ke efe; ha e amane le yona ka letho. Haeba Modimo, ka mora dilemo tse makgolo a leshome le metso e robong tse fetileng, a eme mona hantle, a ntse a Itsebisa, a tsohile bafung; mme

a nka batho ba buswang ke lefu a Iponahatsa, e le Messia mengwaheng yohle, yena Messia ya etsang ntho e tshwanang ka pontsho e tshwanang, O tsohile bafung. Ho tshepisa A tla e etsa pele ho ho Kgutla ha Hae Labobedi le tshenyeho ya lefatshe la Baditjhaba! Ke Enwa. Re tla teba ka yona vekeng ena, ha re ntse re tsamaya. Empa wena, hобaneng o ka sotleha veke yohle, athe o ka fola hona jwale? Motho e mong o beile matsoho hodima hao, wena. Modumedi o beile matsoho hodima hao. O buile Mantswe ana, “Mehlolo e tla tsamaya le ba dumelang ke yona ena. Ha ba Bea matsoho hodima ba kulang, ba tla fola. Ba tla phekolwa.”

²⁵⁹ Le e dumela ka pelo yohle ya lona jwale? [Phutheho e re, “Amen.”—Mong.] Haeba o dumela ka pelo yohle ya hao, mme o dumela ha Jesu Kreste Mora Modimo ya tsohileng, Ya tllang ho o ahlola Setulong sa Kahlolo, a le teng mona bosius bona ka sebopheho le ka botho ba Moya o Halalelang, mme a Itsebahatsa ka pontsho ya Hae e tshwanang ya Mangolo ao A tshepisitseng ho le bontsha yona, le hore O a phela, ke enwa moo A leng teng. Haeba o dumela hoo ka pelo yohle ya hao, mme o Mo amohela e le mofodisi wa hao, ke o laela, ka Lebitso la Hae le ho tswa ho Lebitso la Hae, ho ema ka maoto a hao jwale le ho amohela phodiso ya hao ka Lebitso la Jesu Kreste wa Nazaretha. Ema, haeba o e dumela. Ema.

²⁶⁰ Ke botle. Batho ba tswa mealong, ba tswile ditulong tsa bakudi. Mme hoo ho a babatseha. Jwale isang thoriso ho Yena, motho e mong le e mong phahamisang matsoho a lona. Jwale ke nako ya ho howeletsa le ho isa thoriso ho Yena. Lea dumela na? Batho ba tswile setulong sa bona sa bakudi, ba tswile mealong ya bona, le hohle, ba phahame. Ha re Mo feng thoriso. Motho e mong le e mong phahamisang matsoho a lona feela le Mo rorise. [Phutheho e a nyakalla mme e rorisa Modimo—Mong.] 

BOITSEBISO BA KRESTE MENGWAHENG YOHLE SST64-0409
(The Identification Of Christ In All Ages)

Molaetsa wona, ka Moena William Marrion Branham, o rerilweng sethatong ka Senyesemane ka Labone mantsiboya, Mmesa 9, 1964, mane National Guard Armory, Birmingham, Alabama, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2015 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org